

夢花亭駢體文集

全



吳興劉氏
嘉業堂刊

夢花亭駢體文集目錄

卷一

送吳鑄生先生主講乍浦滿洲書院序

吳右厓鶯湖泛櫂圖序

謝范小庭餽高麗葎啟

釘盤韻事詩序

吳右岑憶花詩序

黃柳橋先生秋夜填詞圖題詞

書魏于雲事

謝吳子音先生惠漆沙硯啟

約同人聽陳雲圃女郎彈琵琶啟

春陞視殯圖記

卷二

范白舫先生苕溪漁隱詞序

范白舫先生苕溪漁隱詩序

范白舫先生漢口叢談序

秦公嘯廬傳

李君鐵笛傳

于問樵聽香樓詞序

葉子良桃花瘞螻圖題詞

董蓮厓先生柳州買醉圖序

孫九靈秋窗烟雨圖序

俞譜華數帆亭圖序

卷三

劉苕漁先生憶書圖序

董壺山先生紫藤花館詞序

巖節母陳太孺人徵詩啟

顧榕屏先生橫山草堂圖序

柳河東小集序

飲香樓詩序

臨野堂圖序

蕉窗讀書圖序

與紫陽監院陳琴齋孝廉書

與殷譜經編修書

卷四

宋岳續忠侯像贊

宋岳鄴侯像贊

孝子岳冰庵先生贊

顧湘舟五十壽序

葉漁莊五湖漁莊圖序

知州銜候選布政司經歷扶九葉君誄

董雲帆先生像贊

葉清甫補華精舍圖序

葉漁莊太湖竹枝詞序

侯選州同知漁莊葉君誄

夢花亭駢體文集目錄

夢花亭駢體文集卷第一

吳興叢書

烏程陸長春瓣香著

送吳鑄生先生主講乍浦滿洲書院序

今使短衣射獵夜臥南山匹馬從軍晨征北漠盾頭磨
墨草露布千言塞上吟詩奏鏡歌一曲折玉關之楊柳
時聞勅勒之聲譜羌笛之梅花頓換伊涼之調將相何
曾有種男兒亦足以豪然而弓矢常燦烽烟久靖才人
捫蝨何處談兵壯士聞雞輒思起舞毛錐擲去空懷殺
賊之心金印懸來未應封侯之驗於是輕裙偶曳短刺
自通鼓角開轅戈鋌肅隊鞭敲銅鐙入幕府而高歌帳
列銀刀向軍門而長揖朗誦六韜之記部將傾聽能開

五石之弓健兒咋舌如吾鑄生先生者何其壯也先生
文陣雄師詞壇老將筆花怒放血戰千人詩律精嚴長
城五字相如之賦飄飄欲凌雲龍門之文落落有奇氣
屬以琴將煮鶴書不換鶯釜有鼉生券無驢賣問字之
酒屢覺其空束修之羊甚嫌乎瘦三更機杼難分隣女
之光百里餼糧莫貸監河之潤方朔臣饑欲死馮媛何
以爲家則有晴嵐哈都統者憫范叔之單寒喜鄒陽之
傑傲將軍愛士燒紅蠟以留賓驃騎憐才擊黃塵而饗
客自剝元狐之腋爲量體裁裘請呈白鹿之祥替揮毫
作奏酌叵羅而勸醉十斛葡萄聽刁斗之巡營一聲篳
篥得以後驂同載長鋏無歌牙兵供乎指揮校尉仰其

聲息酒邊說劍鬚作戟張席上橫刀膽如桶大先生之
願足矣都統之心猶未艾也乍浦有滿洲書院延先生
掌之以五經通儒作八旗都講牛心啖後塵尾揮餘名
高師傅之中座出元戎之右門前立雪多長槍殺虎之
材帳下談經有硬弩吟猿之技以忠信爲甲冑以道德
作干戈借詩書消强悍之風懼金鼓裂英雄之氣相與
安絃撫綬雅歌投壺夫子博我以文諸生以時習禮上
佐

聖主臨雍之化中慰司徒造士之懷下答都督傾襟之
誼將見戎行勁旅盡識文章技擊材官無慚儒雅分竿
角射春秋有講武之歡從壯獻豸草野備干城之選然

則此行也又豈徒縱轡壁門之內驍騎改容抵掌華屋
之間上公前席而已哉先生行矣僕夫歌驪候人如鷺
聘辭敦厚識儒將之風流傲骨嶙峋寬書生之禮數殘
牙尙健來食五侯之鯖豪氣能飛去奪三軍之槊他日
槐花黃後細柳營歸示我以金鉦鼓吹之詞鐵撥琵琶
之唱當細細挑燈讀之也

吳右厓鶯湖泛櫂圖序

涼波盪翠新蒲弄香魚唼葉而聽吟鷗選花而眠夢討
秋之句載諸孤蓬懷美之思飄自短笛雙槳擘綠一竿
釣青菱乍采而歌聞綸罷垂而謳起此吳君右厓鶯湖
泛櫂圖也夫烟波之詠通之紅鱗恬淡之情盟於白水

昔人理榜待月扣舷唱春草屨撈鰕竹闌鬪鴨輕雲粘
乎簞笠落花點上秧蓑橫塘夢蛤之鄉疏柳垂虹之路
玉簫金管坐乎兩頭蜺妹魚姑窺之半面類皆寄情舟
楫招隱烟蘿家妻孥於一船浮書畫於單舸雲山四碧
愴然忘歸矣然而纓濯空歌梁炊未熟纖儵可樂雖有
美乎濠梁倦鳥尙飛輒自罹乎矰繳語夫蕢洲笛譜琴
港漁筒雕盤菰米之香碧澗芹羹之味未有不思拋塵
鞅願製荷衣秋水吟溯洄之詩美人動遲暮之感煎茶
一具付之樵青沽酒滿瓶酌以太白盡棄田廬之事長
爲菰蘆中人也今右厓脚不插於軟紅心自澄於空碧
慕漁家之樂只傍鴛鴦賦彼澤之陂剛開菡萏小舫如

織遠山若無鷺一足而莎拳花四壁而艇礙點篙徑去
搖櫓還來則當夫紫蟹初肥銀魚爛賤放桃花之春溜
趁石鱖之秋風平波臺前尋煙而語畫眉橋畔解纜以
嬉移撓紅藕香中舉網綠楊陰裏錦鯉三尺躍諸船頭
銀蟾半鉤墮於篷背小令被之絃管閒情寫以畫圖幾
幾乎疑陶峴以水仙傲志和之漁父矣僕家住苕溪門
多楓樹數椽板屋築亦臨流一箇瓜皮牽之就舡徒以
歸心水阻鄉夢雲迷遂使青雀翹余白鷗笑我乖細雨
斜風之調負鱸魚蒹葭之期釣伴常招浪遊殊悔江南
秋好新詞宜唱竹枝渡口人逢畫楫須迎桃葉

謝范小庭餽高麗棧啟

僕貧惟飲水潔似秋蟬病不禁寒瘦逾仙鶴鄙露葵之
心熱最愛瓜涼貪崖蜜之齒甘輒嫌茶苦行同木槁肘
見柳生河魚之疾未瘳花豬之內無味亦嘗評量本草
檢校方書八月斷壺三年蓄艾而園中杞菊不賦龜蒙
井上麴蘗空號叔展醫未逢乎扁鵲骨欲出乎飛龍今
蒙上藥輕投靈芝分餉長鑱刷去猶連瑤島之雲妙劑
量來尙帶金盤之露結仙根於海外珠草含胎鍾秀氣
於天南琪花吐豔細嚼則泉生舌本微噙而香滿齕間
勝燒不老之丹抵喫長生之果嗟嗟黃精當飯大可療
饑甘草代茶應能解渴歎防風之粥妄想延年噉茯苓
之湯便思益壽桃子難偷乎方朔刀圭要乞於姮娥絳

雪能嘗元霜願搗酥人休慮拜軍中羊叔之貽畫我何
須免洞口劉郎之采

余有天台采藥圖

飴盤韻事詩序

名原可噉何來畫餅之譏膽亦能豪請試題饊之手若
乃街隣米市廡賃僧房借香積之厨設花養之店元霜
夜搗嫦娥杵落三更白雪晨炊菩薩甘分一饌金刀碎
劃疑翻鶯鬪之波粉甌勻蒸巧竊蟾圓之樣微和菱薺
濃配糖霜每當賈客停撓遠人問姓青錢數去笑看姹
女蛾眉絳紙攢來彩奪蠻王獅子靡不堆盤小喫懷袖
分遺饑可饜乎老饕換欲脫之半臂吟邊細嚼詩添名
士之題茶罷輕拈香沁美人之齒遂爾聲騰蕭寺價重

花坊蓋閔蘭餘之以饀得名於平望也百年於茲矣爰
有冷淡詩翁清饒經叟托來香鉢須問饌饌拆作蓮花
但燒餽飪話新餐於臘盡粥鼓剛敲憶佳味於春前餽
簫正脆一籠遠餽片月齊飛乍臨乞米之書恰過禁煙
之候自笑黃蘗白飯老腹常枵試看玉屑瓊糜童心陡
觸誇他巧製慰我調饑不煎李昊之酥爭說吳均之餅
詩倡於丁敬身徵君而汪楞伽家鐵簫孫補雲吳鑄生
王硯農諸先生相繼作之食譜新翻吟牋小擘嘗餘蜜
餌點心可當梅花分得詩脾汗手豈同寒具妙各噙香
口角滴粉毫尖徵名秬粳之先數典餽飪之外洵可補
牢丸之闕品佐薄夜之新炊因小物之芳甘著才人之

吐屬矣僕餽飢難工齒牙偏利瓦甌糧盡煙斷厨中山
寺齋空鐘鳴飯後食麋易瘦飲水何肥新稻秈香覺此
味遠逾白粲上林花好看他年飽啖紅綾

吳右岑憶花詩序

望五雲之樓閣綽約多仙感一覺之煙花繁華是夢何
況生來北里碧玉深藏家住青溪小姑未嫁而門前楊
柳尙繫斑騅篋內羅裙已飛胡蝶有不心傷鴛牒腸斷
烏欄寫紅愁綠慘之辭寄粉賸香消之恨也乎吳君右
岑載酒石城訪春鐵甕陌頭脫帽笑看羅敷渡口移船
偷迎桃葉破瓜十五情人樂府之詩窺玉三年臣里東
家之對偶通眉語遂共目成歌捉搦於枕邊舞翩翻於

掌上脫指環爲贈心比金堅說紅豆相思淚如鉛瀉祇
怕名花落去須教細馬馱歸然而買笑錢慳藏嬌屋小
量珠一斛奇貨方居剪燭雙條良媒苦託不得已而紅
鸞生拆黃鶯單飛挂輕帆於丁字簾前遲佳約於辛夷
花後盼天涯之書信郎是才人采山下之薜蘿妾爲思
婦蓋已口銜石闕骨瘦香桃悵別鳳於簫樓泣飛龍於
藥店者矣迨至前度人來去年門閉朱櫳寂靜鸚鵡無
聲碧檻淒涼蠨蛸在戶鎖呆愚之屈膝燕子樓空拋繾
帕之纏頭桃花扇冷秋孃易逝春夢難圓女牀之鸞鳥
不鳴古巷之枇杷亦萎青廬未拜紅粉先灰金縷箱中
香雲半剪玉鉤斜畔涼月如絲委短命於輕塵哭美人

於黃土爰成憶花詩十首卽和王夢樓太守原韻也嗟
乎薄倖名多返魂香少啼痕點點濕透鮫綃仙影姍姍
呼來甲帳問賣珠之舊婢已懺空王邀記曲之鄰倡半
歸廝養誰談往事祇益淒脾禪榻三更鬢絲催我棠梨
一樹麥飯澆伊和落葉而悲吟苔繁絃之哀響題成斑
管且鐫從蘇小碑中寫以冰紈請讀向朝雲墓上

黃柳橋先生秋夜填詞圖題詞

孤燈暈綠寒花媚紅疎雨催詩碎蛩啼夢吟情未洽愁
懷轉深殷子譜經借梅梢而敲門撥落葉而尋徑以柳
橋先生秋夜填詞圖索題濁酒不空素琴無悶匏尊且
屬絃絲欲鳴則如瘦月穿簾清香炙硯花滴微露墨生

皺雲蠟盤淚濃鳴爐斑凝汲井絲牽玉虎圍屏夢繞金
鷺宜其擲笛摹聲截簫當譜貫驪珠之一索織鴛機之
九張香心亂飛好句如贈紅拈豆子黃掐檀痕招明蟾
而訴愁和涼蟀以語恨新聲偶倚小令居多其或街櫺
敲冰簷騎走鐵哀雁罷淚病蟹歌吟淒風閃櫺薄寒到
枕梧桐秋影芭蕉雨聲剔銀釭而未明把金杯而不落
劍繡宜嘯瑟希乃鏗則又感慨捶銅低昂奮袖效促節
之舞發曼聲而歌殘星忽明短竹欲裂水龍調激火鳳
絃驚尤足與綽板爭雄金戈並噉也已長春病骨花蘇
秋心蟬抱海棠顛發香草詞成里耳銅諸箏琵琶浮名換
以斟唱安得逕攜酒榼遠托漁船打漿鴛鴦湖頭艤櫂

胭脂滙畔尋師花裏坐我圖中冰鏡圓時木樨開後微
吟白苾試賭紅鬪辨減字之雙聲著薰香之半臂與先
生酬唱於笛牀茗椀間也

書魏于雲事

碧月虧輪紅粉都傷命薄黃金鑄錯青蛾最忌情多從
來閨閣之私半爲聰明所誤冰言未倩玉炫終羞然而
女子善懷春花有淚佳人殉節井水無波生慚白璧之
瑕死抱烏欄之誓亦可謂心堅匪石志決摩笄者矣魏
于雲者武塘良家女也秀骨葩含小名玉刻生成嬌靨
不用施朱鬪出纖腰非因減食擎來掌上徑寸珠圓笑
擲眉尖兩鬢蟬躡捉雙飛之螭描上春衫采並蒂之蘭

紉爲秋佩羅衣欲換薰添荳蔻之香粉袖微汗湔向桃
花之水況復解圍語捷詠絮才多辨第四之絃作行三
之妹每值紡甄月落繡榻花飛燒蠟淚以填詞掐檀痕
而製譜閒攜珊管手鈔班婕之詩自割冰綃背畫洛神
之像不禁忍俊洵屬可人維是簫史不逢彩鸞未嫁罵
東風於窻下輕薄生憎拜新月於樓頭團圓暗祝其父
以爲良緣可卜快婿當求溫嶠非才玉臺誰贈阿嬌願
得金屋須謀故于雲年已及笄猶擇人而未字也則有
袁郎者賣賦相如尋春杜牧斑駁得得只繫垂楊鸚鵡
喃喃巧呼香茗偶來城北遂住牆東魏翁憐范叔而贈
袍效伯通之賃廡得以雞棲粉蝶燕宿雕梁與于雲織

室斜連鏡牀相向一篝燈暈夜讀聞聲半押簾痕晨妝
見影深憐未覺平視無猜軋軋機邊齒拚梭折冷冷絃
上心借琴挑半面偷窺三年不許逮至紫泥封就紅豆
吟成花唾毫鮮珠排字密循環展誦情語蟬聯觸緒纏
綿香心蛹活竊念華年易悞佳偶無多名士頰悅傾城
才人半歸厮養倘得命留齊贅歡住秦樓朱檻雙憑綠
牕並坐研來濃墨替改新詞畫得纖眉還修舊史聽鸝
罵燕花開而特倩郎吟碾粉調脂茶熟而連催妾和豈
非閨房豔福風月美談乎加以青鳥爲媒紅牋作合離
無尢吠橋有烏填蝶睡三更蟾圓幾度梯邊響屐危扶
屈曲之欄花下含扉輕啟歲蕤之鑲仙原有路夢亦爲

雲於是齧臂痕深捧心顰淺謂余不信書山海爲盟期
爾無忘指女牛作證淚穿一綫諾重千金然而牧子無
妻偶因雉感小人有母請以羹遺正夜合之花開適當
歸之藥寄兒裝已束祖餞難留因而泣飲烏烏誓申旦
旦春風多厲須慎寒溫此後相思但加餐飯檢篋中之
鍼綫繭指憐儂兆鏡裏之芙蓉鰲頭盼汝風生帆滿潮
落船平鳳去簫孤雁來書斷袁郎歸告母母沮之告兄
兄復尼之婚絕秦歡偶嫌齊大母兮不諒矣信讒言伯
也無知忌招美婦時妨嫁杏期恨愆瓜蔣氏子某蘇季
金多子南服盛壻非玉潤郎是貲捐爲謀鵲鏡之緣思
作鸞篋之奪遣媒白魏魏翁許之將委禽焉于雲口似

味茶心同止棘花羞木接瑟忍絃移舊約終尋不改絲
蘿之訂新歡勉續難迴鐵石之腸梅子含酸杜鵑啼血
爾迺倉皇計盡決絕辭哀短札紅緘秀髮綠剪金鑲羅
帶無非絕命之資約指搔頭總是傷心之物碎妝臺之
明鏡何苦長圓燒佛座之清香惟求早滅竟爾懷貞抱
璞賚恨投繯花無語而色已全枯石可煮而情終不爛
歿後得其遺袁郎書五遺姑別父母書各一類皆矢志
相明椎心自訟是癡是慧亦淚亦聲鈿盒淒涼不信紅
絲誤我兩雲翻覆願將白骨酬君彼袁郎者始爲趙璧
之求終作齊紈之棄不克藏珠櫝裏留燕裙邊雖非李
益負心畢竟元稹薄倖其何以解此情於終古謝彼美

於重泉乎嗚呼香魂渺渺喚已難回仙骨姍姍續寧可
活紅顏有恨竟成小劫之灰黃土無愁不作再生之想
一枝花葬五夜霜飛今者寒食人來新詩鬼唱苔痕細
剔請題碧蘚之碑麥飯誰澆替埽紅梨之墓告名姝於
幽夢乞幼婦之香辭彩筆慚余青衫慟爾過馬嵬而展
拜千秋長恨之歌拾鴛瓦而書銘三尺埋香之冢

謝吳子音先生惠漆沙硯啟

龍睛點後忽現光明蟹爪爬餘惟聞郭索塗成丹蘄樓
臺生金碧之輝借作飛揚圖陣肅風雲之氣然而工加
髣飾詞唱浪淘粘或如膠擲堪作飯不過三分入木一
夜量籌作宮並詠於椅桐暎日偶成乎篆籀未有圓池

巧鑿可當猪肝瘦骨新磨能生鵠眼者也長春術少點
金錯空鑄鐵眸同糊漆妍媸之鑿易淆學比搏沙銖兩
之功難積徒念山猶攻玉石可名田幸曳白之無慚將
守元而終老所恨銅臺雀墜玉滴蛛乾舊琢塵埋新陶
土蝕雲腴一片巖壑深寒坑老千年蛟龍出沒愛讀襄
陽之史難求鬱林之裝茲承尺璧隆頒百朋珍錫雕盤
光黝產自新羅古洞霞蒸披從博浪黑水是煎熬而出
紅爐經鍛鍊而成比特達於圭璋補新編於金石攜來
袖裏似華嶽之輕雲洗向池邊等泗濱之浮磬匣原可
捧冰不煩呵從此兔穎新開麋丸小試韭花薤葉佐我
標題茗椀琴牀商他位置定必千金紀惠幾字鏤銘墨

欲磨人可歎世途之黑漆石能生我勝藏勾漏之丹砂

約同人聽陳雲圃女郎彈琵琶啟

舞衫歌扇何妨我輩鍾情酒譜花盟大抵人生行樂況
復渡頭船到桃葉堪迎陌上桑青柳枝未嫁纖纖約指
能調火鳳之絃噤噤新簧解作春鶯之語倘不香車喚
去響板傳來玉腕微明燒盡三條紅蠟金杯不落消將
幾箇黃昏其何以陶寫閒愁勾留羈緒乎雲圃女郎青
蓮孕骨碧玉鑄名影倩鴻驚香多蝶戀相逢問姓家居
鸚鵡湖邊生小同鄉門掩枇杷花裏拋來紅豆但記歌
聲畫得烏絲自抄簫譜思華年而鼓瑟出素手而鳴箏
市上人過輸金錢而滿袖燈前曲罷擲錦繡而纏頭今

者帆借風吹裾留仙住么絃漫撚驚飛裂帛之聲短拍
新教彈出傾盃之序半面之檀槽側抱一雙之玉柱交
橫僕紅粉私憐青衫慣濕江湖載酒曾留薄倖之名花
月填詞又下多情之淚燭痕短後茗味同時相與伴盞
論心更衣話舊頻年飄泊難禁萍絮之愁此夜淒涼遂
觸荻楓之感一蕉飲我半臂遮伊所恨季子金空相如
裘典題成小扇請用歌償量要眞珠難將詩換爰陳草
酌專俟華軒蟾光挂楊柳稍頭象板放海棠花畔寧嫌
杜牧發酒後之狂言頗願周郎顧筵前之誤曲笑任青
蚨買去醉教紅袖扶歸轉絳樹之雙聲代黃鸝之三請
相邀知已來聽細抹粗挑忍把浮名去換淺斟低唱

春塋視殯圖記

宿草淒碧野棠媚紅鶯啼無聲鵲哭有血蒿徑通屐苔
花繡棺一坏之土未封數椽之瓦如屋此吾友李君鐵
笛殯宮也歎逝之賦感愴夫年華思舊之情纏綿於夢
寐憶夫玉樓遽召錦囊已灰元伯發喪精靈通之范式
荀郎年少後事託於鍾君輒復彈琴慟今挂榻傷往餘
哀貢諸絲竹泣淚化乎瓊瑰何況華表來歸不見令威
之鶴芙蓉誰主未報曼卿之騾舊札蝸涎新阡鼠走倘
匪踏蘼蕪而喚汝隨蝴蝶以尋君剪紙招長吉之魂醜
酒哭喬元之墓何以洩楚歌之哀些慰若敖之餒而爰
於上冢之天迺舉祭墀之禮斯時也飛絮織恨孤蓬盪

春綠陰罨其半溪遠山露之一髻燕麥漸秀鳶箏忽鳴
孿陳根而涕零思往誓而腹痛香炷乍爇詩篇雜焚野
菽初陳乾牯遂薦梨花之飯飽之滿盂茅柴之耐酌以
三爵展拜未已孤魂可呼白楊蕭騷兮似秋紅日慘澹
而欲暮肴核旣徹紙灰亂飛寧無死後之靈尙疑生前
之飲肥魚之社約鬼客於田間隻雞之局訂詩人於地
下亦可悲矣嗟乎明明玉樹竟爾長埋黯黯黃壚何堪
再過夷門客到其悼信陵之亡隴上吟成無補陳安之
弔雖復生芻可奠寶劍終懸驢鳴效於靈牀牛眠卜其
住宅而盤餐小具寒食空來卮酒爭澆九泉難到亦何
解乎狐兔之哀號松栢之亂拱也豐碑未豎誰表東郭

之銘短調休吹怕聽隣家之笛圖爲翁小海維所作會

者七人唐子珊先生壽萼吳右岑渙孫九靈靈琳秦子

青文元孫琴恬激陳子松壽熊及余時甲午暮春十有

二日

夢花亭駢體文集卷第一

夢花亭駢體文集卷第二

烏程陸長春瓣香著

范白舫先生茗溪漁隱詞序

風笛飄枕秋花壓蓬翠綸一絲烏篔三尺鱸味剛美鷗
盟未寒白蘋弄其暗香紅菱熟夫軟角繫榜待月撈船
犯煙徘徊於雁際蛩邊延佇於露初星晚茶夢且索琴
歌相聞茅柴之酒沾諸下箸水調之曲唱自前溪其惟
吾白舫先生茗溪漁隱詞乎蓋其情淡若秋心閒於艇
瀟湘之佩非美人其誰貽薜蘿之思惟香草兮可語塵
網乍脫烟波似招商量買山之錢安插浮家之願舟可
當屋花皆是隣簫管坐乎兩頭妻孥載之一舸雲水之

趣發之長吟蓑笠之圖描以短幅窅然意遠邈乎思深
矣當夫涼雨跳珠遠山露髻槩劃波碎榔圍鏡圓蜻蜓
立乎帽簷銀魚躍自睨眼彼澤之什惜菡萏之已殘橫
塘之夢笑蛤蜊之爛賤湖莼箸滑石鱖盤肥則且皎皫
而歌倚楫而語斜風細雨請填漁父之詞流水桃花又
換竹枝之體飄飄乎落落乎吹鸞鳳之清音洗箏琵琶之
俗韻焉迨乎釣鴨船歸賣魚人去蘆汀路黑老蟾忽明
蓼溆煙昏瘦蟹初上雁櫓搖綠鰕筒放青拳鷺貢其閒
情睡鵝酣乎涼夢亦復摹聲月底討句秋邊訂簫譜之
譌寫笛家之怨銅斗響拍連呼大白之浮香絃亂鳴低
喚小紅之唱尤覺嘯傲自得鬚眉欲仙江湖有此散人

山水驚爲知己矣猥以賤子不才濫廁詞壇末座摸魚
之調短竹橫吹采蓮之歌雙鬟暗度偶拋初服來換浮
名舊遊罨畫溪頭久客櫻桃湖畔乞子胥之麥飯憶淮
陰之釣竿亦思舴艋輕租陂塘徑買攜將茶竈掉入荷
花狂吟樂府之遺笑譜漁家之傲適投綺製愧報瑤華
錦鯉書來腸斷天涯草碧洞簫曲罷夢留江上峯青

范白舫先生苕溪漁隱詩序

夫麋鹿之性羈縻乎山林猿鶴之思習狎乎松菊餌纖
鱗於碧沼不如江湖之樂也閉綿羽於雕籠不若榆枋
之適也人有寄情巖谷戢影煙蘿晚菘佐餐大餅當飯
卜燕子之宅買桃花之田紅雨衝而犁雲綠蓑披之釣

月一旦芒屨裹脚席帽蒙頭短鬢飛霜輕裝似葉酒味
苦澁離懷亦醺燈光澹熒鄉夢更瘦未有不征鴻怨往
瘖馬思歸櫻筍數於春厨莼鱸憶夫秋箸如吾白舫先
生者重有慨焉先生唾地文成凌雲筆健塊壘盡去書
多貯胸穠華自來花豔堆吻精金躍於爐冶古調應乎
管絃宜乎出手得盧舉頭見日吐金華殿裏之語然天
祿閣中之藜卽不然而雁稅租宅牛衣免泣盟鷗訂鷺
漁父歌之志和種竹養魚家風嗣乎少伯婚嫁可畢煙
波爲徒而乃蟲號杼寒驢押券賣救饑惟堪煮字仰屋
何能著書於是短刺自懷長袖起舞細弱并載謝臯駘
之送孥壺漿遠迎勞鄭莊之置驛獨漉獨漉熟聽輪蹄

之聲采薇采薇薇吟柳雪之什笛韻送晚鞭絲弄秋所
過白帝城邊周郎壁下入蜀拜武侯之栢浮湘式屈原
之閭劍閣淋鈴製曲淒聞苦雨漢皋解佩通辭笑託微
波投詩而贈海棠攀條而泣楊柳薛濤并豔花落寒泉
神女祠荒狐鳴夜火靡不摩挲銅狄酣飲泥壚尋臥蘇
之斷碑認沉沙之折戟弔古之作馳騁乎風雲當杯之
歌激昂乎金石其音律壯也其感慨深也今夫高臺置
酒山川足以盪胸廢壘談兵箏琶因之變調是以雷公
筆法江聲助其洶涌焉成連琴音海水資其飛舞焉使
徒維繫馬櫪視息蝸廬耳不聞風濤澎湃而鳴目不睹
嵩華岌屹之險雖復鬚眉盡脫謠詠相聞而社鼓村絃

難希韶譎之奏街談里語羞稱冠裳之倫非井底之鼃
卽遼東之豕以視夫花開吳市壯士吹簫日落函關酒
人擊筑其間相去奚翅徑庭然則公之心至老而未衰
公之詩殆窮而愈工歟長春諛墓金空買山錢少蕭蕭
葛帔難禦西風翟翟竹竿悔拋白水每念黃柑晚熟紫
蟹秋肥秔稻初香芋栗正美亦復鄉書繫雁客劍歌魚
思耘東臯之煙去種南山之豆他日長卿游倦季子來
歸相與射鴨撈蝦烘茶焙筍貫桑落之釀和竹枝之辭
雞豚往還杯盤贈答當相視而笑也關山在望想騎欵
段從公消息難忘幸折梅花寄我

范白舫先生漢口叢談序

樓頭擲笛落五月之梅花馬上攀條感昔年之楊柳則
有賣驢博士騎鶴寓公負雞次之典於吳宮搜龍威之
書於禹穴仙槎似葉裹糧探黃河之源零雨其濛破斧
詠東山之什忽爾輕裝赴沔長風渡江攬宿莽於汀洲
采石華於遠渚鄉心一箸來食武昌之魚家書萬金去
附衡陽之雁意惟是愁彈劍鋏夢落刀環歌山樞蟋蟀
之篇灑香草蘼蕪之淚然而登高而作賦者大夫之志
也乘軺而采風者太史之職也吾人釋鞞名區弛擔樂
土玩其風物韶秀山川邈緜舊雨能來濁醪無恙亦宜
囊琴憶往捉酒談今徵里衍之新聞補輶軒之別錄如
吾白舫先生漢口叢談一書誠宛委之奇編嫺嬛之秘

笈也今夫齊諧諾臯志仙鬼也而人以為誕矣廣輿益地象河嶽也而人以為侈矣沿至小說託於虞初秘辛雜之漢紀拾遺博物競祖荒唐天寶開元豔談宮禁徒襲賣鼠販鼃之弊初無筆鍼墨炙之奇此書則古錦爲囊粲花作論明明列宿羅於胸中歷歷諸峯現之掌上太冲著賦筆札堆諸戶庭仁裕瀚腸沙石皆成篆籀每當鶯初雁晚竹所花邊苦茗澆來瘦筇扶後話前遊於僧寺滿地斜陽數往事於賓筵一場春夢有句皆畫之壁無語不登於心耳目所周卷冊遂富尋其體制可得言焉昔禹貢爲治水之書爾雅有釋山之詁一瓢斟酌味判淄澠五嶽登臨形如培塿類各擬思光之傑構資

少文之臥遊公導幡冢之源流躡香爐之前劣沔口湏
口溯其奔騰大別小別挹之蒼翠湘江似練廻環襟帶
之間楚岫如鍼描畫髻鬟之品足以破酈元之謗陋起
郭璞之膏肓至於步履尋幽攜尊弔古郎官湖畔鷓鴣
啼向春風神女臺邊麋鹿遊於芳草拜息媯之廟桃花
黯澹而無言觸太白之樓明月團欒而入抱時復然犀
燭暗縫綆探深鴛鴦之墜瓦飄來銘鏤銅綠蟲鼠之殘
碑讀出字剔苔紅蟲語悲秋辨前代帝王之冢雞聲唱
夢問千年雲雨之鄉筆點春花淚如鉛水若乃通闔帶
闔近肆遙屋裊比戶之炊煙放連宵之燈火笙歌糾縵
一條軟繡之街車馬喧闐十里鬧紅之市鬪揚州之甲

夢馬二
第花月千門分淮海之銅山魚鹽萬井其間茶寮酒望
餅碓饅坊仙翁賣卜之簾老嫗送花之店靡不瞭同指
掌朗如列眉窩可號夫銷金圖自成於畫地他若獅王
琳宇鹿女珠宮開青豆之房借黃梁之枕一天花雨飛
來簷荀香中大地金銀湧出華嚴經裏偶憶寒爐煨芋
夜泊聞鐘踏葉尋僧拈花獻佛漱楊枝水來談彌勒之
禪參玉版師且喫伊蒲之飯因而誦毘伽之梵志拓頭
陀之碑文鎮玉帶於山門誌紗籠於粉壁謂非繞樹皆
鳴音樂彈指卽現樓臺者乎夫當陽旣征戰之場鄂渚
實烽煙之地曹瞞兵覆礮火連江陶侃軍屯旌旗蔽日
河北之鴟兒未去關東之蛾賊復來公對赤壁之山紀

黃巾之亂守陴皆哭眾志成城狹巷無聲殺人如草往
往燐飛星碧血染花殷拾臥雨之殘槍出沉沙之斷鏃
秋墳鬼唱猶聞鼙鼓之聲夜月孤鳴尙戴髑髏而舞低
徊不盡感慨係之復有鸚鵡才人蓮花幕客猪肝啖罷
牛耳操餘遙聯贈縞之歡盛作題襟之會黃雞白莧小
局招邀綠酒紅燈狂吟跌宕愴自晨星零落古調淒涼
歇旗鼓於騷壇點姓名於鬼簿宜乎手鈔珠玉泣墮瓊
瑰嘔血生前僅把殘編付我招魂地下焚將佳傳酬君
聊彈雍門之琴似答山陽之笛下至西隣歌舞北里煙
花荳蔻梢頭枇杷巷裏拋來紅豆記豔曲於妝樓濕遍
青衫聽哀絃於酒座鬢絲如雪老大傷余骨瘦于桃風

塵誤汝亦復閒情
婉孌綺語蟬聯
鬢影衣香珊珊紙上
飛花落絮去去天涯
畫楞嚴十種之仙觸
小杜前番之夢洵可
抵板橋之雜記補樂
府之新題也已嗟嗟
白水盟心舊約難忘
鷗鷺紅塵插脚浮生
易逐輪蹄驚瞥眼之
風花年華似箭仰打
頭之梁屋窮愁著書
今者司馬歸來子雲
老去禪房借月吟榻
安花茶茶夢剛圓詩
懷幸健飫家鄉之滋
味紫蟹銀魚尋先子
之釣遊斜風細雨方
擬綸竿假我蓑笠描
公租放鳴之船唱摸
魚之闕言而不食樂
此忘疲不謂菱角初
香萍花又散三更嘯
詠再上南樓百里煙
波暫辭西塞匆匆鞭
鐙難洵鷓蟀之愁草
草杯盤莫與雞豚之
社未免情深潭水淚
落江潮

乃於驢歌之在門下付鴻篇而督序既洞窺夫全豹遂
勉測以寸蠡明年春水生時盼到紅鱗之信今夜秋衾
擁後夢爲黃鶴之遊

秦公嘯廬傳

公姓秦諱丕烈字啟人一字嘯廬江蘇震澤縣人祖某
父某並門高通德篋有藏書三歲食貧不改絃歌之業
一經教子特發芝蘭之馨公秀質同葩奇姿似玉送來
釋抱上應謫星試到啼聲知爲英物識之無兩字齒是
初生辨燈盞四聲角猶未總年十四通春秋三傳黃童
爲江夏無雙叔開乃洛中第一揚華布實說詩輒解人
頤抽秘騁妍摘詞必求已出邑侯吳公見其所作文大

加稱賞持白學使侯官平公公謂其文有蘇韓氣洵不
誣也健翮方張迴颺忽引怒鱗急鼓弱水偏沉公以确
犖之材吐光芒之語即使桐幾入爨蕙已遭焚亦何難
懸斷布而再登跨強臺而直上獨是長眉高髻羞爲時
世之妝筵弄么絃恥習淫哇之唱而且疏水之樂未必
遜於玉饌金炊也苑囿之歡未必適於長林豐草也於
是絕簪纓之想策枕葑之勳著鴻烈萬餘言鈔蟲書八
千紙纂癸辛之雜志鉛槧忘疲拜庚子之五經衣冠必
謹蕭該推漢書宗匠阮秀是儒林丈人令聞所彰學者
慕之夫季野四時之氣備於無言叔度千頃之波擾之
不濁公純修是踐安宅能居雅量比乎海涵信諾逾於

鼎重合貞履樸有仲弓之稱抱潔懷清得伯夷之聖嘗
游鹿城見遺金追其主而返之師還帶之風等傾囊之
餽足使盜牛而獲者自諱其姓名懷金而謁者稟知於
暮夜歲癸未江南大水淹沒居民田廬無算公哀彼鴻
磬拯諸魚腹募同志者捐資若干以粟隣里之無告者
不給至典衣助之桑梓必恭壺漿不吝殘骸苟活爭歌
續命之田破竈無煙盡仰通腸之米惠之溥也仁莫大
焉禮樂三千光陰半百絳帳之測時間鼓琴青蚨之來
卽以換酒常作詩歌自娛旁及繪事醫理靡不精擅每
當庭花落後爐茗香餘藥苗初肥鳥哢如語輒復解衣
盤礴奮筆淋漓浮以三蕉持蔗竿而舞吟安一字拍銅

斗而歌家居十年忽忽不知其樂也公所著有嘯廬文稿十卷詩三卷雜著八卷於道光己丑十二月十七日卒年五十有三子二長鴻壽次源余與源縞帶聯歡青燈勸學堂前拜母豈無公瑾之交酒後論才猥有元龍之譽屢陳先德屬表遺徽嗚呼令威之鶴歸來城郭不殊於往日于公之門必大詩書勿替乎後人

李君鐵笛傳

辛卯之歲余來鶯湖獲交李君鐵笛見其姿標鶴立儀度鴻騫醴味若飲醇醪清言如霏玉屑孟公入刺一座皆驚超宗到門不衣自煖時吳右岑昆季孫九靈秦子青孫琴恬咸與君樂數晨夕余亦時相過從近局招邀

新詩酬唱每值黃柑秋熟紅豆春肥鑿落盃濃薄持餅
軟一花之賞特備乎隻雞五字之吟或刻以寸蠟琴歌
酒頌樂何如也朝曦雲馳尺波電謝曼卿少祿遽主芙
蓉之城子建多才竟王遮須之國念其漆棺早閉玉樹
生理遺墨寶諸藝林芳徽扁於泉壤則夫考幽綦之履
發潛德之光後死之責何敢讓焉今按君諱湘字叔蘭
號鐵笛又號雨村江蘇震澤縣人世居梅堰鎮曾祖鵬
舉祖光堯均道在師儒言爲坊表羊公之德九世皆能
及人夏侯之經專門卽以遺子父狶始遷韭溪十畝田
園恆栽松菊一船書畫兼載妻孥生二子君其長也羈
貫性成瑰奇幼擅彥昇甫孕預兆金鈴安豐始孩便知

苦李未十歲通四子書及毛詩戴禮稍長能作文慧異
常見業如宿受千言灑灑穿成絡索之珠一賦滔滔瀉
作江河之水未幾椿庭見背君麻衣躡踴血淚枯乾葱
漆斷乎三年雞骨瘦之一把寒宵流涕奇溫不忍衣綿
忌日思親鄉鄰爲之罷社喪眞盡禮孝無間言鵬路風
高游鯤未變龍門水濶河鯉難登嘗再赴童子試不售
遂決然舍去肆力於古蛇足愁添蛾眉懶畫褐衣自貴
金紫何足炫人釣竿可投功名是將餌我有勸令應舉
者輒笑謝之每語人曰吾夙好棲遁少薄紛華但得買
田十雙滋蘭九畹漉陶潛之酒藉可娛賓殺茅容之雞
取以供母願如能遂樂此忘疲此其詩補循陔情甘漱

石視浮雲之過眼蒼狗何多借止水而盟心白鷗堪諒
者也負米途窮登臺債迫掩抑枯魚之泣艱難巧婦之
炊其間姊嫁弟婚兒孀女釧靡不茹荼在口吹棘於心
復以兩世桐棺百年朝露難謀吉壤未卜佳城於是相
度牛眠經營馬鬣卒使前和無齧三版全封不惑錦囊
之言非取麥舟之贈松楸自種特表永叔之阡窀穸能
安爭羨滕公之室而君之志慰矣而君之心瘁矣素有
咯血病癸巳春疾大作至秋益劇於八月十二日卒年
僅三十嗚呼痛哉君學有淵源才同錦繡雷公筆法通
之江聲李翰文思活於鼓吹所作詩多豔體近人中酷
似郭頻伽尤工篆隸手摹秦漢碑百餘種鐵限常穿玉

臺小詠濡來醉墨淋漓脫腕之書修到鬼仙辛苦嘔心
之語待刊元石取付麻沙余與君三載生交兩年死別
瓊瑰之淚輒墮於懷髣髴之容時見諸夢爰持拙筆畧
寫餘恫嗚呼聲作龍吟挂寶帶徐君之劍書成鶴附報
玉樓長吉之魂

于問樵聽香樓詞序

落葉打窻青苔及榻薄酌不醉枯絃輟鳴迷悶慙歡抑
塞誰語山陰之櫂遠命戴逵花裏之門遂開裘仲主人
擘黃柑浮綠醕瘦羊特剗肥雞爛蒸旣行經程添設寒
具三爵壯膽清言亂霏一燈孕花癡語尤媚發其藏篋
屬爲嗚矢今夫匏石殊奏清濁之音諧金絲相宣律呂

之調合箭韶成而長離之鳥至黃鐘彈而麤賓之鐵躍
原其聲韻致感哀樂默召亦猶迅霆怒擊奇葩自胎情
之所發不能藏也于君真想寓襟清氣在骨螺煙十挺
以之寫詩花影一樓時聞吹笛端石乍埽素琴欲言問
殘月曉風豈干卿事著紅禪錦紋誰得臣狂研脂作花
皺綠成恨玩其編竹考律劃釵訂譜探源於梅溪取徑
於石帚吟鶯誦燕唱出櫻桃小令雙聲教之鸚鵡刻燭
半寸酒波微鱗穿珠一囊約指更瘦長袖善舞大簫爲
言或者齊宮懸於筵弄薄鈞天爲爨本是何異被繒絺
於裸鄉振金鼓於龔俗哉尖風釀凍紅梅著花縞衣未
來翠羽欲下請和冰雪細嚼宮商但覺寒香沁入肺腑

則此卷也人目爲花間之繼聲吾視作南華之寓言云爾

葉子良桃花痊蝶圖題詞

姍姍仙骨砌成香冢之愁栩栩春情引入漆園之夢當
其翩翩葉底遊戲花叢巧避鶯捎狂隨燕舞羅裙百摺
輕翻壞綠之痕粉翅一雙低拍小紅之板允宜春衫繡
爾彩筆描伊逮至芳草歌殘飛花命短香魂蛻去只欲
成煙豔福修來何曾解恨生前落魄徒留輕薄之名死
後遊仙尙戀繁華之境得不心憐玉葬劫嘆灰飛葉君
子良當綠肥紅瘦之辰寄鳳靡鸞吡之感憶惜花而起
早疼煞金鈴誤撲蝶之來遲忍攜團扇朱門已閉易傷

詞客之懷絲縷輕飄但綴宮嬙之鬢灑半簾之紅雨
穀惟聲喚一枕之黃梁蘧蘧不醒因而囊收錦瓣地拓
苔弓持鴉觜而營墳裹燕脂而當柳拴松可表聊同白
蟻之封執紼誰來莫慰青蠅之弔鵲娘血漬鳳子香埋
小膽惺忪化紙灰而飛去纖毫隱現搗粉本而初成雖
才子之癡情實文人之好事也嗟嗟二十四番風信已
過花朝一百五日清明剛逢寒食芳菲節誤難禁病酒
之天蟲豸情多又下傷春之淚零香根觸怕來青瑣窻
前冷月彎環只挂玉鉤斜畔築錦泥而不爛澆杏酪而
偏甘此時點筆丹青替他寫照明歲落花時候爲爾招

魂

董蓮厓先生柳洲買醉圖序

微颺蕩漾青颺一帘澄波空明翠劃兩漿荇藻歷歷可
數菰蒲蕭蕭有聲馴鷺候於沙頭纖鱗躍諸榜尾山瘦
露骨雲輕媚鬟垂楊隔溪綠陰罨其如幄畫樓面水紅
窻開而有人此柳洲佳景也蓮厓先生放眼塵中遨頭
湖上於候試之日作招涼之遊爰呼便了偕阿買履換
不借船乘總宜一囊貯詩百錢挂杖尋煙至蘇小墳畔
討秋過段家橋邊紫簫烏烏竹韻欲裂白袷拂拂荷香
若流遠峯迴環爽氣撲眉睫之際煩溽消釋涼意沁心
脾之間詩情旣融飲興忽赴柳外艤舫花南問沽則有
臨湖小亭招客野店綠蟻浮甕翠蛾當壚新筍滴於糟

牀畫榼排之鱗座於是命酌觴晚披襟坐風小阮旁列
大白豪舉花氣通鼻若助杯盤之薰蓮歌盪情可當絲
竹之盛鳴臚味美魚羹啖鮮蔗枝脆而青嚼菱角軟而
紅剝爵引無算罍空欲鳴飛蚨可償不用輕衫質去玉
山已倒合教明月扶歸越日寫柳洲買醉圖所以留雪
泥之痕駐煙墨之景軫念高轍寄情勝遊也今年夏余
與令姪篠垠秀才泛玉湖之權烏篷三尺櫓搖鷗邊碧
螺兩眉岫窺窻隙覩談往蹟并示妙繪幀首尙虛惶引
斯託而余因之有感矣猶憶錢塘門外金牛湖西板屋
曾租槐花屢踏紅簾夜靜撫笛倡孃之樓黃嬌晨酣題
詩酒家之壁曩有詞云自數年來游跡多半酒檣茶幔

對波光山色十里畫船吟晚蓋藕香水榭品茶作也而
年年氍毹淚灑菊花之叢漸漸蕭騷鬢換柳絲之色雖
有醉鄉容我未免山靈笑人他日沙隄共行煙艇復掉
緩控騎驢之轡重把釣魚之竿尙擬松醪賭賒匏尊相
屬一筓酌月三蕉媵花得毋哂公榮之量窄乎素縑可
補須描我在半壁湖山之中紅友能招當尋公於六橋
煙雨之路

孫九靈秋窻煙雨圖序

孤雁遠唳碎蛩亂鳴淒風乍寒薄霧如暝花餘紅而媚
砌苔綠綠而上牆落葉走於庭中濕雲墮向簷際梧桐
之影黯澹織夫新愁芭蕉之聲點滴逗諸涼夢則孫君

九靈秋窻煙雨圖也夫閒鷗之志不離煙波美人之思
常在雲水誠以幽抱獨結孤懷自深塵無軟紅室有虛
白討秋之約盟諸碧蘿之間聽雨之吟刻以銀燭爲限
雖復衾冷似鐵屋低於舟爐香不溫茗味甚苦坐空館
而無語望夫君以未來亦何能感以淒清惱其岑寂乎
故夫遠岫忽隱微波初鱗哀砧響乎女嬃病杼動於隣
婦鈴鐸欲語紙窻有聲氣蕭瑟而變衰情憤恨而若膏
空階一滴兩滴長漏三更四更而孫君方手和琴絃囊
括詩片酌梨花之釀蟻蠕饔頭臨薤葉之書蚓活腕底
妙緒紛觸眞想在襟石闌偶憑一篇自譜銅鉢小擊寸
牋亂飛洵足以攄騷客之牢憂破索居之迷悶也曩者

花街泥滑蓬巷人稀著屐尋君典衣醉我相與喫蘋婆
之果飲甘藷之漿酣情既濃癡語共賭殘燈半蕊搖漾
乎綺疏斜墨數行淋漓乎粉壁不嫌狂態輒許知心所
恨僕青衫淚多綠鬢愁疊似馮衍之善病甚蘭臺之悲
秋每當蠡殼窻明麋丸墨淨雨絲紡柳煙痕漲花亦欲
寫以素縑圖此幽景而當風便噫肺疾難醫畏寒似雙
腰帶易瘦藥裏常近丹青遂虛已秋聲在樹不妨君自
讀書明月窺簾記取我來吹笛

俞譜華數帆亭圖序

夫風雨觸對牀之感倚壁燈青池塘聯入夢之吟迎簾
草綠昔人繾綣壙篋之奏流連萼跗之花陟岡望兄看

雲憶弟未有不萍憐蒂散烏羨羣飛何況戀鄉味於山
厨熟過櫻筍候歸舳於春渚約誤薔薇目斷音書未遇
衡陽之雁歌彈劍鍊貪食湘波之魚落木蕭蕭惟吹敗
葉西風獵獵不挂輕蒲能無腸似迴輪心同結轆也乎
俞君譜華早失春暉幼依乾蔭麻衣埽地淚落如絲燭
影搖檠嶂空若水而乃扶牀索果孃竟長眠繞室牽裾
爺將遠別兒心欲碎祖餞堪悲於是姊替裁襦兄教識
字三更鄰杼微分夜讀之光一味園蔬共勸晨餐之膳
梨原知讓茶不妨茹逮至許武成名羊公娶婦而素車
挽到歌虞殯於途中丹旄飛來賦楚招於江上行裝久
滯旅櫬遙歸蓋其尊人楚中之訃至矣設於此而租菱

算橋牀脚錢堆剪韭烹葵甌頭飯熟書無乞米硯可代
田則雖蘭葉凋霜莫慰循陔之願而荆花著樹猶聯同
室之歡無如饑易驅人窮難送鬼一行雁字瘦影初分
三疊驪歌銷魂此別伯也旣渡江而北季兮復沿漢而
西相逢應說項斯此去暫依劉表爾乃豬肝日啖旅食
多艱鵲口晨占歸期未準瀉波流之九曲汛漲黃河繞
嶺路之千盤山連赤壁箜篌調苦江干聞喚渡之聲楊
柳愁長馬上灑攀條之泣秋風起而思蕪菜夜月落而
夢刀環譜華念幾度之蟾圓先一家之鶴望緘封鄭重
空歸賣賦之金雲樹周遮未打回船之鼓每值汀花開
後沙鳥飛時兩槩搖來一椀過處未嘗不盈盈目送悵

悵心勞聽隔院之寒砧敲殘霜月撼倚樓之長笛落徧
梅花爰乞德清徐湘生夫人作數帆亭圖蓋取杜少陵
江閣嫌津柳風帆數驛亭句也嗟乎貧家兄弟一半飄
零客路寒溫萬千珍重愁朝愁暮來乘漢使之槎聽水
聽風去附荆商之舶坐使天倫樂減世味辛多苔荒李
氏之園綿冷姜家之被宜乎攬青青之鬢怕插茱萸歌
鞞鞞之詩睠懷常棣也他日人還破冢船到洞庭相與
剪燭窻西停杯酒半傾談客況細說家常吐別後之相
思猿愁鶴怨踐歸來之夙約蟹美魚肥當不復興望遠
之悲作出門之想已布帆風滿家鄉在圖畫之中茅屋
宵寒燈火是團欒之候

夢花亭駢體文集卷第三

烏程陸長春瓣香著

劉茗漁先生憶書圖序

夫昔日桑田半成滄海舊時華屋多換山邱黯黯斜陽
紅到烏衣巷口萋萋芳草綠沿朱雀橋邊感興廢之何
常似雲煙之倏變何況琳瑯壓架孔壁難藏縹軸連箱
曹倉易散而欲銀杯不化玉版常完護三篋之亡守百
城之富不甚難哉然而留清白以傳家者先人之志也
撫栝捲而流涕者孝子之心也一旦金題剝落去其舛
飛玉躐叢殘餐供蠹飽班史以之充食論語取而代薪
能無因空筥而念腰纏對殘燈而懷手澤乎潯溪劉丈

疎雨開宛委之山聚琅嬛之笈李鄴侯架上不少奇編
任彥昇家中率多異本凡夫毛鈔建削宋槧元棊羽陵
石室之儲鴻烈龍威之秘靡不牙標籤綠錦裏贖紅所
蓄至數萬卷築眠琴山館貯之入崔鑣室須讀五千卷
徒張華宅共載三十車可謂雄敵西園豪逾南面矣丹
席未離玉棺遽下平原客散趙氏兒孤舊日汲冢周書
葫蘆漢史束之高閣蛀篋空堆昭以多金鸞篋競奪旣
等楚弓之失復罹崑焰之災歎充棟之無遺悔鑿楹之
未納令侄茗漁先生誦祖德之清芬記童年之逸事苔
階小曝日過花陰棊几勻排香生芸帙兒嘗願讀叔果
非癡乃昔從二酉搜來今被六丁攝去匣原未毀彌深

故劍之思積竟空留絕少還珠之日宜其腸同輪轉心
作旌懸因倩黃穀原先生寫憶書圖所以誌餘恨於緜
緜溯前塵於典籍也嗟嗟王家舊物只剩青氈范氏遺
田惟傳破硯黃金爛漫散去成煙白屋蕭條貧來似水
而此區區者亦復風飄敗葉爨逼焦桐不獲披向花間
讀從樹底論文客至訂三豕之訛送酒人來作一鷓之
借亦可慨已囊螢有願已難望趙璧之歸煮鶴何辜亦
終付秦灰之劫云爾

董壺山先生紫藤花館詞序

吾湖負郭山多螺鬟層疊盪湖蓬小鷓首紛飛翠箔朱
簾家家樓閣鷺汀鷗渚曲曲煙波四圍雲水之鄉一片

空明之境自元真子撈鰕草港射鴨蘆灘倡蓑衣箬笠
之詞播流水桃花之句惟茲勝地代產詞人潯溪分茗
雪之流集釣游之侶紅窻窈窕此中有人碧月彎環不
禁忍俊衣香十里菱唱遙聞煙竹一聲漁歌互答意必
多捶琴石畔讀曲花邊發初三下九之謠嗣竹屋梅溪
之響然而余所見者惟范白舫翁茗溪漁隱詞頗能結
靈想於煙蘿寓孤懷於斟酌絃匏應律笙磬同音時翁
折楊柳於漢南譜梅花於笛裏屬爲前馬之導因寄雙
魚之書玩其雋裁允推作手孤芳競賞同調伊誰今讀
壺山先生詞而又喜耳目之頓新風流之未艾也今夫
翠袖紅巾得香柔之趣瓊樓玉宇逞疎曠之才是以花

下雛姬宜敲檀板關西大漢合唱銅琶境地不同聲音
各異惟是留雲借雨易近淫哇哀竹豪絲或成爨弄但
工妖豔難逃法秀之呵未習鏗鏘輒和髯蘇之韻風斯
下矣識者譏之先生奇抱獨抒食古而化雲霞滌其腸
胃冰雪遜其聰明五行得金氣最多六律知黃鐘爲本
於是含宮嚼徵補樂府之新題減字偷聲樹詞壇之巨
幟每際蛩吟露晚蝶怨春初睡鴨香消牽牛花吐穿成
豆子但有情絲劃徧闌干儘饒癡語一篇脫稿八音克
諧借風月言愁爲誰費淚替鶯花寫照令我消魂洗脂
汙粉垢之容陋劍拔弩張之態以視夫唾絨笑嚼細摹
閨閣之私鐵撥狂彈自詡江山之助彼有乖於大雅此

無愧爲正宗宜乎風雪旗亭雙鬟賭唱鞦韆院落三影
爭傳也已乃覓絃外之賞音謂識曲中之妙旨盡翻蠹
篋索綴駢辭則將以鄙人爲周郎乎抑知半生彈鋏鬢
換青絲十載填詞心灰紅蠟茫茫里耳豈知箏笛之訛
碌碌饑腸慣聽轆轤之轉當此荷花大放芋葉高張惟
願買蜻蛉之舟狎鷓鴣之鳥候大江之歸客白舫翁續西
塞之舊游相與追暑前溪尋煙古渡著接離而舞拍銅
斗而歌先生應亦樂乎此也蓬窻共載當遲君於紅蓼
灣頭菊部能招先坐我於紫藤花底

嚴節母陳太孺人徵詩啟

夫飛霜殞並命之禽悽悽黃鵠積雪瘁含貞之木鬱鬱

青松溯高行於梁媛并滄枯水凜堅操於巴婦臺扇清
風斯皆志決摩笄身同抱璞三生永誓一死靡它洵可
以表潔紅塵揚輝彤管然而黃泉之殉不若隱忍之愈
難也白刃之戕不若從容之彌苦也誠得團欒鏡撲無
渝金石之盟壽考諉榮益勵冰霜之節如我嚴母陳太
孺人者尤堪標作閨型傳諸壺史也已當其毓秀瓊軒
含英璇室修容有則不矜鉛澤之華舉趾無愆自協珩
璜之韻令儀足式靜女其姝逮歸竹筠嚴先生也佳耦
曰妃和聲應於琴瑟善心爲窈喜氣溢於門闌旣諧鳳
卜之歡常致雞鳴之警誨從姆教曲唱姑恩方且樂之
子之宜家共良人而偕老矣今夫荆山之玉匪遭別則

幾類於砒砒也欵冬之花匪凌寒則無殊於桃李也如其案不移鴻車堪挽鹿永絕此離之歎何徵志節之奇乃金鈴纔墮於懷而玉棺早降其室抽來雪繭已成寡女之絲着上花綳便作孤兒之泣嗚呼痛哉斯時也一燈燄小四壁風淒淚漬篁斑心摧蘖苦獨抱崩城之痛將爲同穴之謀特以鶴髮凋殘正含酸於堂上鳳雛浴罷方索乳於牀頭設或慟絕釵分情甘玉碎則白頭黯黯彌增思子之悲黃口齶齶忍見呼孃之慘捐生甚易守義良難於是哀吟髮髦之詩泣受庭幃之訓蒿簪插髻辛苦牽蘿麻布裁裙淒涼恤緯蛾眉不畫龜手忘疲其事祖姑與姑羹湯代竈婢而親調厠膾先冢婦而躬

滌噓寒問暖常懷愛日之思潔膳馨羞克替循咳之職
慈烏最樂孝筍長甜其教子希涑織可斷紕字能畫荻
家傳清白不少藏書後有兒孫無忘先澤咸服敬姜之
教奚慚孟母之賢他若推產以成已廉刲股以療父疾
外事必咨夫家督內言不出於閨門賑貧乏而桑梓被
其恩施恤勤劬而婢媪樂其春及此其細者可無述已
自母之稱未亡人四十有九年其間苦雨酸風單鳧別
鶴庭對孤生之竹闌栽獨活之花蓋已淚竭千絲腸迴
九折悲深銜石痛極呼天卒能皓月同清寒梅比潔仰
事則如彼俛畜則如此然後知枝非凡榦當搖落而始
顯其真劍是神鋒經淬礪而益增其彩也厥後輶軒使

采

綸綍朝頌貞筠暎

鳳勅之輝壽木煥

龍章之色金錢

天賚綽楔雲標頌聲翕於里閭徽音載諸家乘嗚呼榮
已所願玉局詩仙芸臺學士或濡毫而垂露或振筆而
飛花交傳石碣之銘

嚴鐵橋先生
作墓碣銘

共鑒栢舟之志手揮

煙墨口吐珠璣得隻字之褒揚勝百朋之寵錫仨哀羣
玉用勒貞珉庶幾一片慈雲覆儒林而不滅千秋發曜
傍文宿而常明

顧榕屏先生橫山草堂圖序

去海鹽縣西南三十里有橫山焉一角煙痕濃描螺髻
四圍雲影淡感魚鱗滴空翠於巖阿撲遙青於林樾變
昏旦之景倏異陰晴走龍蛇之姿如開圖畫涼月挂藤
蘿之上梵宮在縹緲之間小築能營幽懷斯暢唐顧逋
翁嘗隱居其中劉長卿有橫山訪顧山人詩卽其處也
當其樵薪谷口步履花南非惠非夷不巾不屨濯簪纓
之垢澗有清泉避車馬之喧門無俗軌寒梅瘦鶴自成
世外之妻孥朗月清風誰識山中之富貴獨抱煙霞之
癖疑是羲皇上人宜乎一鷗白雲呼僮耕徧九重丹詔
對客封還落落乎其志之高飄飄乎其意之遠也唐代
至今千有餘載荷衣香冷草長苔荒蕙帳飈寒猿啼鶴

怨淮南桂樹徒成招隱之篇洞口桃花豈有迷津之術
幽人既往勝境誰探榕屏先生慕著作之風出華陽之
系蕉衫桐帽自得風流菡菜鱸魚好聞棲遯心超塵累
味淡世腴誦先人之清芬無忘潔白領名山之佳趣可
以寤歌嘗欲架屋三椽誅茅十笏蒔藥滿圃編枳成籬
石上眠琴花間置榻詩筒畫卷標以白玉之籤茗椀香
爐設於烏皮之几俗慮盡洗孤懷自澄每當岫幌晨開
雲扃夕啟巖花落袂嵐翠沾衣五字吟成聰明似餐冰
雪百城坐擁笑傲足抵王侯洵可以嗣美前修希蹤往
哲無如人事牽率夙願未酬既無買山之錢空縈讀書
之念一花一木昔年之種植如新某水某邱先子之鈞

游宛在登覽所及憤恨有加楮墨能傳丹青遂託嗟乎
二分種竹難尋隱士之廬十萬買隣願近高賢之里誠
得遠離囂市獨闢幽棲林巒活其性情漁樵與之贈荅
甕頭酒熟許借一甌之書籬畔蔬香獲噉雙弓之米則
雖伯通廡下許住梁鴻臨邛市中爭迎司馬終不輟此
而就彼也君如歸隱休重懷出岫之心我若移家請預
作連牆之訂

柳河東小集序

在昔南朝風月家傳玉樹之歌北里煙花人續妝樓之
記其時天開色界仙聚楞巖洞有香迷峯多雲隱門鏡
中之眉影春色三分送簾底之簫聲畫船十里幾乎一

錢看去盡是夷光雙槳迎來無非桃葉矣然而媚行煙
視不少傾城摘豔薰香誰爲博士設有詩工刻翠字妙
題紅走珊管而花飛織霞機而錦現如河東君柳如是
者誠繡闥之金英蘭閨之瓊蕊也君以婉麗之才處繁

華之境歌成楊柳畧記前身

君本姓楊

采得蘼蕪遂爲小字

明眸盛鬢不爭時世之妝烏帽青衫自畫風流之像迹
其樓扃燕子舸泛鴟夷倚裳文醮之場步履湖山之畔
寶欲浣靈襟於冰雪逃小劫於風花故夫三竺吟煙六
橋唱月若湖上草一編足以見其柔情婉孌逸致遙深
焉迨至委身旣失清流得堦猶然名士錦帆低挂偏來
擲果之人銀燭高燒先賦催妝之句玉缸暖而酒波碧

映緋綵繫而芝印紅鈴蒙叟謂眞仙合住瓊樓阿嬌須
藏金屋於是別開邃館巧築層臺青山作屏絳雲號額
其中尊彝斑駁圖籍縱橫畫叉與粉碓雜陳鏡匣共筆
牀相近每當茶煙颺候藥裏香餘研薇水而郎吟擘桃
牋而妾和芳情燕婉寫丁娘十索之詞綺語蟬聯續子
夜四時之詠卽我聞室次韻諸作是也花月時遷滄桑
局變白頭惜死紅粉銜冤卒之野史亭邊涕屑遺山之
老石頭城畔齒冷彥回之生而君綵筆先焚蒲團枯坐
呵辭法秀偈說朝雲黃花之晚節彌香白璧之微瑕靜
掩遂使名傳彤管無慚靜女之稱人愛綠珠翻出季倫
之上則此集也不尤足取重香歛增輝瑤宿乎震澤王

硯農徵君拾鸞鳳之墜羽挹蘅芷之清芬博採遺篇都
成小集旁及章臺短札記室零牋舊約說與薔薇所思
托諸蘭茝蠶眠字小蝶訴愁長亦復摘葉晨鈔燃脂暝
寫珠排字密墨聚香多下至學士標題詞人憑弔或攜
來酒榼淚灑蘇小之墳或襲以錦綈腸斷崔徽之貌碑
文苔繡競搨硬黃鏡影花涵分摹古綠高文何綺名作
如林靡不貯以瓊函登諸玉簡允稱完璧合付雕梨鳴
呼才冠青樓脉脉之香心欲語花開紅豆珊珊之仙佩
疑來

飲香樓詩序

吾湖山水清遠風物瑰奇有月皆香無花不韻靈淑之

氣間鍾於嬋媛絃匏之音交應於閨闈蓋自管仲姬寧
芳蘭茁刻秀茗華弄姿玉湖之間領袖金釵之隊由茲
勝地代產名娟金屋深藏銀毫自舞內言不出幽光莫
宣故每有秋月能吟春椒善頌玉臺珍其斷稿香籤悶
其清芬空下女牀之鸞終隱南山之豹辨華剝滅識者
憾焉今讀吳罕珍夫人飲香樓詩靈想獨結孤懷自深
沆瀣得餐霞之味聰明似鏤雪而成獨能謝彼鉛華標
其馨逸而乃畫簾選韻早工飛絮之辭圓鏡觀空僅現
曇花之影又未嘗不歎其才之豐年之嗇也夫人爲碧
城張丈之室而芋園半峯兩先生之女兄也當其珠胎
孕月璇宮降星芝有靈芽梅無俗骨才誇道韞施步障

以解圍賦誦王褒爲洞簫而作謚每值爐煙裊後茗味
濃時鶯嬌能歌花媚欲語與兩先生含葩吐采鬪韻分
題鏡檻風來滿榻亂翻書帙紡磚月落隔簾猶有吟聲
無間燠篴之和克備家庭之樂泊乎簫吹引鳳枕聽鳴
雞郎吟却扇之詩妾和催妝之詠借生花之彩筆學畫
長眉移刺繡之銀釭替商佳句文禽對語玉樹交柯則
又似高柔之玩賢妻劉綱之得仙儷焉碧月宵沉紅蘭
夕萎盤中字賸膝上絃淒金井泣夫寒蠶彩裙化爲胡
蝶薰衣篝冷香消鷓鴣之斑寫韻樓空塵挂蠨蛸之網
遂使行鷺雁斷影弔鳧單咽夔女之清礎感潘安之長
簞同氣之戚淚溢乎荆花獨旦之吟悲深於蒙楚亦足

傷已然而芳華易謝者年之無常也金石同貞者名之
不朽也夫人雖瓊枝早折玉燕先埋殫殍之日居多瑟
琴之懽有限而此一卷也幸得搜從蠹篋寫以烏欄含
麝劑之古香發鴛機之新豔足以垂光結綠奪彩長離
釵茸粉絮之旁幾多零墨繡閣文牕之內此是傳人又
何必眉梨耄駘始得謂之壽耶余與兩先生忝文字之
知結紀羣之好酒邊感舊嗟短夢於浮漚花下論詩溯
清才於香茗因授是集屬爲引喞嗚呼華算能延願作
絳紗之弟子前身可悟應爲萼綠之仙人

臨野堂圖序

夫故家之思感深於喬木先人之業愛及於敝廬吾儕

承堂構之遺悅松菊之趣蓬蒿滿徑剝啄無聞風雨一
椽歎歌不廢允爲君子所芋無異碩人之藹而乃尋緣
野之莊惟餘荒草問烏衣之巷已換斜陽燕麥寫其淒
涼鶯花悲其畹晚有不愴念舊德流連故基傷陵谷之
變遷歎室廡之傾侈乎臨野堂者吳江鈕玉樵先生著
書之所也當其鳴琴下邑種花劇縣學優則仕無操刀
之傷政平以和有懸鞭之治所宰項城白水蒲城高明
等邑巖疆犬錯獷俗鴟張往往伏莽興戎漚管致釁先
生宥過於既往消患於未萌爲牛羊而求芻異鷹鷂之
用猛于公斷獄能洗覆盆之冤巖叟除偷盡毀大房之
跡遂使林無虎嘯泮革鴟音房豹至而鹹水甘桑懌來

而盜風息神明之頌慈惠之稱至今邑中人猶追溯之也出岫雲還在山泉好因苦筍而致仕愛叢桂之留人謀杜陵草堂之資仿蘭成小園之制於是量弓拓地縛枳成籬十畝栽桑二分種竹而堂之中畫又顛倒書軸紛披丹鉛漬茵席之間筆硯著窗戶之際每值卯酣醒後午夢回餘呼僮埽花留客門茗棲神於毫楮引緒於緇繩風月佐其清談煙霞託之藻詠俯仰足樂撰述有加泊乎舄化鳧飛身騎鯨去蕙帳空而鶴唳苔磴冷而蟹啼而斯堂則鼠跡墉穿蝸涎壁漫涼月如弔寒煙欲迷納楹之書盡資以易米草元之稿竟至於覆瓿衰祚僅延式微甚矣嗟嗟舊家池館半爲瓦礫之場昔日亭

臺已作樵薪之地無論鏤檻易折畫棟先摧金谷燐寒
平泉樹賣卽此玉川破屋粟里柴門黓藻繡之華多水
竹之勝而亦犁成蔬圃絡以豆棚薪木已見毀傷庭階
無從彷彿不尤可慨歎吾友山琴先生之族孫也誦士
衡之先芬述靈運之祖德憫夫堂基久壞棖題無存寄
野興於一筇度遺規於十笏思還故物用紹前型乃返
汶陽之田宿諾無負而築輞川之墅繇力弗勝鬱情莫
宣繪事斯託緘書屢逮敦序於余余嘗拈松陵之舟過
穆溪之野愛其風土清淑桑麻鋪棻漁竿挂乎水門書
聲出於茅屋雁奴魚婢徵逐於荻蘆之灣瓜疇芋區縱
橫於原隰之畔輒欲移家入畫開軒面場踵高賢之履

綦脫塵累之鞿鞞請以暇日從事名山今觀此幀益適
我願他日買山錢辦賣賦金贏賃庶可謝伯通卜居且
就詹尹與山琴並謀小築近接芳鄰拳石孤花閒商位
置九柯十匠稍事經營鍛竈設於柳邊吟榻移之竹所
時因茶話且續觚言則是圖也匪特寓秩干考室之情
并可代太冲招隱之什爾

蕉窗讀畫圖序

潯溪之曲桑柘翳野花木交春衡茆之宇相望釣游之
侶是集居近市肆便於行沽室無塵璫可以坐隱洗心
多煙霞之趣卜宅與魚鳥爲鄰中有一廬環以眾綠二
分種竹有水有石之區十雙買田半村半郭之地粉垣

繚以百步紅欄曲而四圍落花滿芳徑之間淡月寫碧
紗之影則楊君小亭蕉窗在焉君妙擅荆關癖嗜顧陸
萬趣融其神思三祖具有師承蒿筆之秀欲訴真宰錦
幃之設似聞濤聲每值鷓鴣肪香甜烏皮几淨一簾風展
十酒花催盡發桓元之厨獨對少文之壁幽賞所及縑
素締其古懽澄懷以觀山水寄其遐想足以蕩累怡物
游目移情運筆得乎神似絃詩無此味勝讀畫之圖所
由作也余屢敏君室見夫翠旗高卓疏間紅薇綠扇低
遮濃迷青瑣漏月無罅聽秋有聲宜銘懷素之庵恍披
摩詰之幃而窗之中鴉叉密挂螺汁狂濡丹黃漬於几
案膠絹積如山海渲染大幅旣元氣淋漓點綴微蟲亦

秋毫宛具時出藏卷各爲指陳評泊所加藻鑑莫遁惜
余未諳傅彩兼昧品題但喜愈其宿疾惟恐汗夫寒具
不能與君細論神妙互尋端倪假粉墨以爲緣託圖繪
而結契爲可恨爾倘容分以片席坐近綠陰吟榻置於
花邊茶竈移之竹裏相與悟衷散賞祛煩滌塵我自敲
詩君仍讀畫捶琴韻協敵洪響於球鐙落紙雲飛詫奇
觀於海嶽蹋壁入壺之狀研丹擘石之形合爲一圖並
足千古素心可証雅懷莫伸息壤之盟此卷是券煙墨
有知當不笑余之唐突也

與紫陽監院陳琴齋孝廉書

籍甚清徽芬於蘭茝龍門在望無任欽遲前寓湖堦承

枉存問積雨新霽勝侶爲招有事幽尋遂阻良覲俞君
補華茗話僧寮縷述雅意噓枯植朽冀暢茂其根芟搜
璧采珍懼韜匿其光彩旣謀館粲之所復籌膏火之需
情誼懇摯有加無已其感與報宜若何圖之然而未敢
奉命者非以鳴高豈願守拙揆其不可蓋有數端請爲
詳其故焉少年意氣跋扈飛揚廣坐揮毫能賦鸚鵡離
亭把琰不唱鷓鴣竊願舞纛文場作奏幕府羞爲三舍
之避輕視萬里之行短鬢雖凋壯心未已胡乃局促致
類轅駒特以門祚衰寒兄弟終鮮有老母在已逼榆年
負米之責固無憚於行遠采蘭之願祇自切於循陔卽
川塗匪遙越宿可至而晨昏屢隔易動陟屺之吟音書

偶疎莫慰倚閭之望此不可者一也或者游子行役將
母不遑健婦持門可代色養旨甘無虞闕失痾癢乃敬
抑搔則雖省視有違子職多曠而升堂而乳藉申反哺
之私有方之游奚須當歸之寄乃自丙歲悼亡童烏繼
歿鰥居五載破鏡始合今夏噩夢炊臼又占厨下匙嘗
羹之人室中無主饋之婦若復遠去熒熒白髮轉益淒
涼此不可者二也省會之區士多於鯽名流號召壇坫
邳張大抵分立門戶各樹標幟設以謏陋得蝨其間牙
琴誰知點瑟空鼓寸長之擅必見嫉於蛾眉一字之疵
恐貽譏於駱疥天性亢直旣狂且愚附和不能挫辱弗
受儻因懲拙之故致來標榜之嫌小有凌侮輒欲按劍

自恨瘦來傲骨倍覺峻嶒醒後酒腸仍露芒角因此齟齬不合時宜此不可者三也制舉之文言非中出販鬻賣鼠侈尙新奇丐馥沾膏第事擄擗童弁受業鄙其體卑所謂文章當不僅是父師督促強爲效顰斤斤繩墨苦逾桎梏非遇試事未嘗操觚生平所作不及百首今欲抗衡羣彥獻技有司必將拘守法程鑽研故紙盡廢典籍之嗜無間胝沫之勤所好不存必形桷鑿況乎院課敦迫月有兩期刻日呈藝豈容寬假每歲一試尙憚其煩時時作未諳此苦此不可者四也具此數事遂甘樞伏仰答厚意請俟異時閣下竭推袁之衷蓄鑄顏之念不以樛散而輟班輸之斤不以奔踉而廢造父之

御非惟慕之又羅致之非惟憐之且欲成就之好賢之雅愛士之誠求諸當世實罕其比虞仲翔云得一知己可以無恨走今而後永矢弗諼已尖風釀寒玉梅香動湖山高詠瓌製必多公車發軔當在何日此盼良訊以代塵談

與殷譜經編修書

北望長安邈若霄漢懷戀反側形諸寤言睽離以來忽踰十稔眷念曩昔如隔崇朝人壽幾何亮均斯感前歲手告去夏始達慰誨懃懇情溢楮毫勗以進取之途寬其怫鬱之抱三復循省敢忘此規然而屢蹶之乘鞭策不能奮其程已鍛之翮囚笱足以損其志揣無投時之

器因爲遂非之辭并述其身之所遭者惟君子察焉取
士之科首重時藝一王定制範圍不踰父教其子師授
諸弟循誦習傳無間陬澁故人自毀齒就傅束髮受書
粗解四子之文罔識六經之義輒復專事帖括求試有
司頭腦任其冬烘牴沫勤乎夏課詞華則轉相剽竊風
氣乃競尙揣摩孜孜矻矻皓首靡悔而心術壞諸八股
眼光囿於一孔詫甄盜爲奇字誤南華是僻書讀雌霓
而失諧疑金根而舛改能薄材謏識者嗤焉僕夙好典
籍志在博覽家無藏本垂涎鄴架間以瓶借自爲影鈔
所見未多有愧半豹辭章之學卽云小技雕蟲篆刻壯
夫不爲然屈宋初始於前班馬揆張於後由茲以降代

有專家藉以揚厲風騷潤色鴻業若僕之淺陋滯拙手
未觸龍威之編目未窺羽陵之蠹而欲強事獺祭自珍
鳳采卽有撰述亦同糠粃何敢妄希大雅之名忝附作
者之列而振金石於龔俗鄭樂可當簫韶之音被冠裳
於裸鄉卉服無殊文繡之飾聊以自悅匪求人知也至
於舉業雖自童習圓枘方鑿多所齟齬讀文半首則唯
恐臥草藝一篇神氣俱索試於未冠出手得盧老宿傾
屬謂爲有造乃半塗自廢棄若弁髦旣愧宋人刻楮之
勤奚有楚將穿楊之技故二十年來文猶馘馘氣亦衰
頽常抱退鷁之思空隨立鵠之隊甲科中雋誤擊副車
今歲再登斷布又墜鍛火未熾金入冶而不飛琢工弗

良玉在璞而終別自今以往并絕妄營一第何足慰人
千秋自有絕業方將遂其初志罄以澄心焚膏短晷之
餘漱潤羣玉之府卽就所得發而爲文食古能化當必
有進以視懷挾兔冊但襲陳言手度鴛鍼自誇新樣屢
省尙恐失鵠詭遇又難獲禽沈沒苦海之中老死場屋
之內孰得孰失必有能辨之者且夫達人知命豈有慕
於紛華君子固窮亦何傷乎願領以樸佩韋古訓淡於
俗情悟榮悴之無常覺欣戚之俱泯樵蘇不覈清談亦
佳環堵蕭然讀書自若有何憤恨不能去懷而欲訴南
山之饑興北門之慨哉乃否塞屯蹙百倍於人骨肉無
幾死喪相繼早失伯魚過庭之訓旋應張瞻炊臼之徵

復軫楊公舐犢之情更櫻田氏分荆之痛今夏閏五鼓
盆又歌旣無張憑之佳兒并乏左思之嬌女煢煢子立
惟老母在耳藐躬似粟逢此百罹精亡魄散淚涸腸斷
非李聃而生苦縣甚朝霞之號窮人自有肺腸能無於
邑來書謂困阨其遇所以磨礪賢豪拂亂所爲將以玉
成志士理或有之僕未敢信也況乎夷衾久冷殯宮未
葬欲妥幽魂須謀窆穴過紅簫之隴徒羨佳城聞白楊
之風輒念枯骨搏膺增慟薄葬難營欲如巨卿執紼而
來堯夫舉舟以贈求諸今世罕覩其人硯田磽塉常遇
惡歲筆耕所入僅足餐錢樹蔭堂背甘旨屢缺而范馨
遺硯子敬舊檀相如短襜微之蓋篋時因謬臺之迫都

夢馬三
爲質庫之儲破書以外別無長物此後之命途通塞境
遇菀枯亦聽諸造物而已緣荷教督敢述覲縷期於達
忱不覺辭費足下砥學淵深飛藻雲肆領蓬瀛仙職紬
玉堂寶書所積益厚大文彌著前年典試鄂渚墨程刊
布翕然同稱藻鑑精審已可概見他日入侍講幄出掌
文衡榮問休光照耀宇內君所固有無俟尸祝僕則願
輶車南指得榜卿雲開東閣之門弗施行馬丐西江之
潤以活枯魚區區之私朝夕以冀三千里路相見末由
燕地風寒慎護眠食附鶴有便勿虛嗣音

夢花亭駢體文集卷第三

夢花亭駢體文集卷第四

烏程陸長春瓣香者

宋岳續忠侯像贊

并序

慨自柑皮字畫計決東窗鐵棒刑熬冤沈北寺丹心未
死魂游雪窖之天碧血長埋淚灑圜扉之草遂至背崑
盡散破卵難完愛壻同歸佳兒合傳金牛湖畔裹馬革
而屍攢銀瓶井邊濺燕脂而骨碎鄂王之遇禍可謂烈
已時候年纔卅角分合灰釘椎心狴犴之中待命鼎鑊
之側大讐未復恥共戴天小子何辜悲深搶地乃以漏
網得竄遐荒載鐵籠而宵行著麻衣而遠戍蠻烟瘴雨
倍增慘怛之懷毒霧愁雲似憫呼號之狀遠徙嶺表幾

死者數矣泊乎雞竿赦下馬角生還天子褒先臣之功
海內識相公之子臨朝而念道濟徒壞長城表墓而祭
潼亭能致大鳥乃得求還宸翰許勅崇祠王之志雖未
畢於生前王之忠不大白於身後耶而侯則痛伏波戰
績惹苒蒙讒樂羊謗書萋斐動聽定爰書於三字陔作
風波標心跡於千秋炳如星日於是臚陳實事鉤剔舊
聞訪故老而歔歔呼殘兵而對語考證既確摭摭遂多
擬上諸朝會病革未果臨終以付其子俾成厥志若侯
者可不謂孝思不匱者歟至其取友必端養民以惠訐
謨入告九重前席而聽酒脯具陳百姓攀轅而慟忠蓋
之嗣宜如是已嗚呼昔拜王祠肅衣冠而起敬今瞻侯

像儻狀貌之如生爰爲贊三

巨姦構禍論功行戮鍛獄以炭置俎如肉魄毅魂號屍
糜血漉酌酒敵賀投憤士哭煢煢孤兒遠竄南夷跼鳶
路絕履虎身危心苦於藥命懸似絲風霆礪駭嶺海流
離見睨雪消恩綽粹至金錢卹孤玉醴諭祭蟻忱俯陳
龍章乞賜天子領頤近臣屑涕我父我兄並罹於殃在
朝在野罔不盡傷精忠貫日奇冤隕霜每一念之摧肝
裂腸青蠅善讒白璧思玷昭雪可冀詆誣盍辨往事芻
詢實錄筆顯擬排帝閭蕪編泣展私誠未罄宿疾遽攫
遺恨次骨彌留吞聲呼兒來前吾言汝聽汝克承志吾
目乃瞑父爲忠臣子爲孝子忠孝兩完雖死不死廟留

湖山名炳圖史福衡豆房馨香永祀

宋岳鄴侯像贊

并序

夫詩歌繩武不忝前人書美象賢乃稱令子是必德穎
秀擢性芬遠流淳至挺白齟齬誠懇積於肺腑闡揚先
代深披瀝之思紹述貽謀懍隕越之懼而本學術爲經
濟無愧通材標政治於文章有裨國是如岳忠武王之
孫鄴侯者祖竭忠忱父抱孝行忠孝之後克繼家聲其
人尤足述焉維侯淑靈誕鍾秀慧濬發胸羅斗宿耿耿
元精躬蹈規繩舉舉雅度幼秉遺訓誓雪沈寃痛碧血
之長埋英魂雨泣剔青燈而無焰苦語霜寒爲籲天辨
誣錄五卷并百韻詩以獻特邀睿鑒得賜寵褒膚功用

嘉典祀無闕夫靈運知述祖德致美昔賢趙括能讀父
書見推前哲以侯擬之奚止什百過之哉籀雲足驥搏
颺翩展柳雪無歎憚瘡彌勞迹其捧檄江東轉饗淮上
金布令甲一軍無譁天風海濤雙桅竟渡家傳兵法識
撼岳之難民卽田功尠藏鏡之患乃以積勩游歷崇階
摠食貨之樞分茅土之錫雖其間含沙蜮射止棘蠅營
幾至辱於桔荇或亦褫其鞶帶而當之旋察其誣權臣
終釋其怨卒能湛恩疊被顯秩久膺報稱具有實心獻
替皆關民瘼甘棠之樹百姓詠其去思宣室之對天子
歎爲莫及宦績所著翕然同稱洎乎退閒研精典籍博
採時事勒爲成書所輯金陀粹編最顯於世餘如程史

愧鄰錄西陲奏稿東陲事畧北征錄寶真齋法書贊九
經三傳沿革例棠湖玉楮諸詩集並照燭三才輝麗萬
有脛走海內秩然經世之言津逮後來允矣藏山之業
史稱通儒不其然歟楊李爲侯桑梓之邦去吾鄉不百
里而近挂席屢過踏葉曾來因謁遺祠得瞻巍像西湖
薦菊餘忠臣烈士之悲南浦停橈動孝子順孫之感援
筆作贊愴然於懷贊曰

維嶽降神篤生英哲幼露岐嶷家傳忠烈泉壤飲恨冰
霜瀝血茹荼孰憐覆盆疇雪遺言在耳責膺藐躬懼弗
能任憂心忡忡霜棲簡白淚湮字紅匍服殿廷泣表丹
衷一編展陳九重惻愴哀此蓋臣禍由姦相撤膳賜祀

樹闕旌葬奇枉已直高爵莫讓桓桓三軍如虎如貔汝
往監之毋使恬嬉駢駢征夫載渴載飢汝往餉之無俾
怨咨入總度支出銜綸綍靡盬王事吁嗟民疾心戀黼
辰躬受圭黻讒口徒囂渥遇無失養痾却軌屏跡金陀
蒲柳編削几席摩抄脫腕書速畫掌記多山川草木盡
入搜羅王昔銜冤侯白其事父思上書子成厥志功在
生民言垂後世忠孝之風維侯克嗣聖湖之涘駕水之
旁巋字並峙丹雘輝煌王靈未泯侯澤孔長宜其子孫
振振代昌

孝子岳冰庵先生贊

并序

世之論孝者每以簪組之華能榮其先代榮戟之列實

振其家聲誠懷報本之思無踰顯親之義是以王脩泣
社不若萬石旌門也蔡順號瑩不若歐陽表墓也寵秩
旣膺孝德最著不知綸綍之錫但美其推崇箕裘之志
尤貴於紹述其有仰承令緒克廸前光慰九原涕洟之
心緜百世烝嘗之典如我冰庵先生者不更勝養備牲
牢恩邀黻冕乎先生姓岳氏諱鑑字明之冰庵其自號
也幼稟孳性夙標殊姿擅聖童之譽湔義方之訓伯瑜
之受母杖力憫其衰顧悌之讀父書句乎夫諾甫四齡
王母陸太君卒悲愴如成人踰年王父白雲公卒亦如
之孩提知孝其性然矣逮長補博士弟子學窮經庫聲
雋翼序方將擘翅蓬海驥足雲衢巍科顯仕操券以竣

而先生父厂村公崦嶷漸迫几杖相依有慕天倫之樂
不以人爵爲貴榜李城西故有鄂王祠歲久傾侈遺址
僅存公力圖鼎新志在復舊以家窶終不能舉臨歿謂
先生曰王祠未葺吾遺憾也且兩世桐棺在殯兄嫂諸
寡姊衰齡無依汝成數事吾目瞑矣先生稽首受命泣
而誌之艱棘旣丁哀毀彌甚蔥淙斷乎三年雞骨瘦無
一把孝哉閔子人無間言次年卽爲恢復祠宇計因焚
君苗之視遂習計然之策晨則嗇膳而購片埴暮則典
衣而易一椽凡夫竹頭木屑之資備極銖積黍稷之瘁
而其配李孺人亦情甘撒瑱躬自辟纁蓋篋屢搜宵杼
必顧以佐其興作以相爲蠹沒乃得鴻規大啟鳩工有

期卜吉於梁卯梯黃程功於堊黝丹漆雕楹玉碣備堂
廡之觀椒馨餽香致享祀之潔更拓旁宇創爲支祠歲
時展敬禮儀無闕旣合葬考妣旋奉曾王父母王父母
窆焉復自十二世祖以下諸贈公塋並加封識無前和
之齧有佳城之營楹松議植麥舟却贈瓦漉白屑誌先
德於豐碑隴築紅簫陋吉徵於手版其事世父母與諸
姑省視莫違洗腆致慶先意承志不殊所生咸能得其
歡心無負諂屬至於建希文之義莊緝蘇家之族譜親
串待以舉火交游賴其指困義漿仁粟之施惠流於桑
梓喪車薶錢之助澤及於幽冥此又推孝子錫類之恩
溥大公無我之德世有身居槐棘誼薄本根但願一已

之崇奉罔恤族人之捐瘠聞先生之風亦可以少媿矣
大吏疏其至行登諸薦牘爰荷

璽書之賁得標綽楔之榮昔袁愉表章純孝里改獨楓
楊炎代傳清芬門樹六闕引古證今良足媲美嗣子鴻
遠爲余弟婦兄郵示行狀乞濡燕筆夫箕山荒冢猶表
迹於龍門厭次遺風且興懷於孝若況乎忝與蘿附素
詒崖畧銘德慕行敢辭無文乃作贊曰

孝乃庸行能盡者鮮盡之匪難道在實踐祿不必厚爵
不在顯繼志述事庶乎黽勉粲粲門子秉其慤誠芳蘭
初佩華黍吹笙簪笏非貴鐘鼎非榮孝乎惟孝光逾甲
名祖祠久湮遺基髣髴徒竄榛芴誰薙我父惻然

冀復舊制絲力莫振賈恨以逝積日計值刻期命工或
斤或削是斲是礪青裙庫質赤仄囊空塗丹飾獲廟貌
攸崇宗祊旣奠窆緯亦舉庇有松楸泣無風雨蟻邱壺
漿罕氏鍾繡人懷其恩式歌且舞置吏入告

寵頒

天章繡栢煥彩椽筆煌煌鳳賡羽翮麟呈趾祥積善之
門必有餘慶皇降匪殊醕風漸息觴豆犯齒稷鉏德色
力輓衰頹至行無飾壽以貞珉芳徽永式

顧湘舟五十壽序

曩以賤役竭來胥江旣釋塵鞅輒事游覽偶戀怪石徧
摩蘚紋緣尋幽人徑造竹所獨愛滄浪亭水木交映軒

胸窈深近闕闔而絕殷鑠之聲非郊垌而得疏野之趣
意必有隱君子者曠世遺俗還元葆真筮鴻磐之爻祛
蟬冕之累屣屐其際歌吟相聞遲之又久曾不獲覲嗣
聞湘舟先生結廬於旁抱道而處惡猩豹而饜仁義屏
絺繡而佩韋弦不簪纓亦華不鐘鼎自富非余所思之
人耶惜未邂逅遇之也今年君春秋五十介汪君薪甫
來徵余文則將以曼辭修褊數典眉梨藻說玢璘增輝
屏幃乎然而挾張之筆識者羞稱媚茲之文吾儒弗貴
卽工頌禱有類小巫或鄰浮夸見譏大雅請徵實事以
代祝辭君夙稟淳至幼露岐嶷發石宛委之山披圖羣
玉之府薈萃墳典鉤索緝繩凡夫孔壁殘經僧瓠真史

汲郡冢中之簡秦坑燼後之書以逮軒帝綠圖留侯赤
霞三摹九据之奧妙五方六甲之周詳罔不洞悉源流
力闢關鍵篝燈而讀無悔十年之遲列城以居可抵諸
侯之貴枕蓆旣久撰述亦多所輯江左金石志百卷歷
代錢幣圖考二十四卷賜硯堂叢書百卷吳郡文編二
百四十卷吳郡詩錄百卷及乾坤正氣集五百名賢圖
贊諸書類皆考訂精審搜羅微眇稿凡幾易極雪纂露
鈔之勤網必兼收無珠沈劍埋之恨足以輝麗萬有囊
括羣言藏之名山允爲絕業吳中自范文正朔立義莊
薦紳巨族多師其遺規於以篤宗親均惠澤誠善舉也
君推一本之念爲百世之謀鉅規兼呈施舍勿吝發高

廩之粟盡是通腸置上腴之田卽能續命暨夫寒鑪暑
帳女布男錢拯疾之刀圭藏身之樁木鉅細咸理周浹
靡遺故能令九族懷仁千秋誌德置吏疏其至行璽書
予以寵褒跡其用心豈在古人後歟他若桃諸梅醞潔
先代之馨香芝栢蕙楊新昔賢之祠宇或布給孤園之
金或設伊蒲塞之饌其細已甚可無述已說者謂懸黎
結綠宜貢王廷駿曩騰黃須馳峻阪以君壯懷磊磊大
才槃槃四達八牖十步九計儻使登之銓選畀以劇繁
移其刊誤書之功以去害馬廣其活族人之誼以恤哀
鴻作春風風人定當官官辦不尤見所蓄者厚而所及
者遠哉抑知戈不春黍者其器殊稻不爲藿者其用別

君方游心竹素託志林泉不慕榮利好聞棲遁情耽蘿
荔軒裳可忘樂在溪山侯王不換而謂能趨揖公府求
媚長官促嘗以走風塵瑣屑而親簿領乎矧夫化行里
鄙奚止淑身書云孝友是亦爲政楹書萬卷勝於縣譜
一編罕粟千鍾比諸召棠百里豈必身任赤緊腰縮銀
青遮侯霸而攀轅報宋登而立社始足謂功德之在人
耶綜厥大端俱可不朽申錫曼羨無踰於茲至於饌丹
石餌松芝資調攝以延齡冀康彊而逢吉飾鳩爲杖稱
兕於堂雖齊祈淪之年無殊浮游之晷世俗之壽當非
君所樂聞故勿贅焉

葉漁莊五湖漁莊圖序

余家苕溪距五湖二十里而近擊楫屢過褰裳相於尋
沿花渚延睇葭浦見夫巨浸浩瀚洪波淼漫煙雲變幻
之姿魚龍駁遯之狀輒胸盪神駭詫爲鉅觀而東西洞
庭兩山並峙中流秀越諸嶺巒氣遠出騰空欲飛峯鬢
半垂著雨尤媚山之中異卉蘊藟怪石璘幽疏泉可以
爲池傍樹因之結屋有田一頃大好讀書種橘千頭亦
能致富知必有人焉盡釋塵鞅獨抱靈襟不慕簪纓之
華自樂澗槩之素睠彼林谷悠悠我思嗣以朋輩竭來
山中盛稱漁莊先生情忘世腴胸貯淵學守道弗失與
古爲徒抗懷羲皇以前築室莫釐之畔蓋卽所思之人
也若將寢寐見之矣今年假榻綠階山館書擔未弛先

敬幽居茗談既洽輒移晴晷棋墅非遠苔屐時至一簾
香護十酒花催呼僮擊鮮留客讀畫出五湖漁莊圖索
序於余循覽數四邈焉興感兔穎雖禿魚樂能知研墨
搗辭其何能已今夫易占鳴鶴恆託跡於在陰詩詠繫
駒每寄情於空谷惟其夙懷獨結孤標自殊尠勺藥之
心極疏曠之致故能皜然不滓堅乎不磷等富貴於浮
雲視軒冕如敝屣君以潛德世居是鄉非爲鳴高豈類
充隱不巾不韞詩人放浪之情某水某邱先子釣游之
地菘鱸飽啖有官亦辭風月最佳無景非畫幽興所託
小築遂營漁莊之勝可畧述其概焉當夫氤氳柳映瑟
瑟波明汀花蘸紅水荇蕩碧好山環其四面夕陽渡於

半湖放鴨之艇齊來打魚之船鱗集鳴根匝近在水
牕遠樹模糊寫之屏絹習爲菰蘆中語可作濠濮上觀
旣愜素心彌見冷趣其或輕煙擁岫缺月候檐警鶴之
露篷沾照蟹之火脚溜漁唱忽發出白花間鷺足半拳
立於沙際狂吹銅笛驚醒老龍之眠洞開碧櫺分占閒
鷗之席則又熱惱盡洗清夢俱恬寥寥乎境之靜飄飄
然意之遠也於焉遲遲迴隔塵瑳世途巖險無足縈懷
以視始託薪歌旋焚芟製羊裘之釣似晦跡於澤中鶴
書之招卽軒眉於席次假終南爲捷徑動北山之移文
度量相越豈可程計僕以疏懶之性亦居水雲之區數
椽老屋旁圍鴨欄一帶垂楊中藏漁榜每值山雨驟至

溪花亂流錦鱗跳波銀魚出網輒欲借彼蓑笠把我綸
竿答蓮塘之棹謳唱蕢洲之笛譜宛在中泚樂且忘歸
今觀是圖倍增結轡倘得謝傭書之役謀買山之錢詩
囊負於短僮茶爐付之小婢請移舴艋尋君畫中定拍
闌干招余花裏不且願盡攜書卷兼載妻孥租菱半畝
浮家一舸終身徜徉於其間乎煙墨有知盟以息壤謂
余不信白鷗鑒之

知州銜候選布政司經歷扶九葉君誄

并序

嗚呼吳岫雲蘿虞淵日昃荒煙冒谷流咽乎石泉涼颺
韻商聲悽夫林木以君仁澤溥徧義問光宣雖無牧民
之權恆有在人德鄉里判事亦號神君豆區餼貧交

推善士一旦福星揜曜喬嶽潛形宜乎婦擗童踊室咷
衢歎撫墓門之楨如慕甘棠望峴首之碑應名淚碣已
猥以櫟質辱居賓館醕風近挹似飮乎芳醴賞音忽遐
宜焚其金軫嗣子長藻等以余稔知素行泣請誅辭將
以導揚遺徽宣播前烈爰濡蕪筆庶慰哀恻誄曰
釐峯之側莫湖之濱靈淑所鍾篤生異人秀孕蘭玉祥
呈鳳麟維家之慶爲世所珍雅度懇懇夙秉淳性出言
有章動容必正几杖躬操盤匱手進惋愉以將孝哉惟
敬金桃善對玉軸勤披伐木求友叩鐘問師能通大意
不尙浮辭胸有神悟書無蓄疑槃槃大才期於致用料
事如神談言微中雲逵匪遙天門待殍求民之瘼爲國

之棟新斲未發艱棘旋丁奇抱鬱結瘦影伶仃親帷霜
白子舍燈青明發不寐曉淚熒熒佳城旣營荒芳乃闢
壤卜紅簫畦連紫陌陳劔設豆羞桃薦麥警欬如聞形
神不隔睽懷桑梓宏濟艱難茂樹蔭暘廣廈庇寒痾瘼
軫念衽席求安是亦爲政奚必彈冠具區湯湯三萬餘
頃龍蟠雲窟爨挾帆影捲雪濤奔折桅風猛簸葉飄蓬
危哉舳舻君集羣力畚揭是儲衛以崇堰濬彼淤渠履
道盡坦入坎無虞一葦杭之直達吳趨災祲屢逢里多
捐瘠雀啅空倉鴻磬中澤舉火有待指困奚惜朝饔夕
殮咸資擘畫煢煢孤兒靡瞻靡依鞠育惟君毋使棄遺
奄奄病夫無藥無醫療球惟君毋使瀕危幽壤榛蕪殘

骸狼藉君子薤錢安其故宅古渡荒寒行蹤躅躑君設
野航濟彼孤客資生匱死餽乏憐無遇紛則解見危必
扶惠周親串化洽里閭凡諸懿行不可殫書門若朝儀
家有庭誥減從聞吏知名媿盜嘉言可銘清修自劭四
氣備躬一鄉服教有瓊在室有書在楹三餘兒課百里
師迎助吟鶯哢照讀黎明壘吹篴和宜弟宜兄埽徑延
賓開筵講藝若金在鎔如玉受礪筆陣摧鋒文壇拔幟
伋貢王廷蔚爲國器比營幽築瑟居閉關疏泉通沼疊
石模山砌花紅蒔庭竹青刪將移繩榻終老其間急景
風馳尺波電謝華屋未成玉棺先下白蜺導旌紫虬駢
駕命厄酉年奄然怛化嗚呼哀哉君以潛德葆其天真

廉頑立懦革薄還淳編戶蒙福闔邑懷仁雖在巖野實
心爲民今歲夏五淫霖肆虐君憫窮黎預謀斗餉白餐
晨炊紅稭宵鑿有事補苴無分衰弱泊乎絲杼魂已舍
離往復詣告念猶在茲一夫不獲若由已飢後事之託
所賴綱維遠水青縈層巒碧峙遺烈鏘洋湖山並美累
德攄詞僅測崖涘書之素旂永垂百祀

董雲帆先生像贊

并序

公姓董氏諱應椿字冠英號雲帆烏程人也系出明大
宗伯溇陽公後簪笏之族代不曠僚詩禮之傳世有令
德公生卽愴定長益瑰奇摘花當餐視石成篆與裴叔
道語若聆琴瑟之音聽管公明言如誦游獵之賦學海

廣納文鋒迅驅煙墨受其指麾紙札任其搖襞精思奇
采無以過焉羊角屢搏鶴羽再鍛強弓獨挽斷布復登
凡七應鄉試始舉嘉慶辛酉賢書鑑以磨而益瑩金在
冶而終躍人皆謂鳳笈旣脫只尺重霄鯤溟遠游瞬息
萬里矣然而宏通者才也否塞者命也干將之器或以
補履騰黃之駿有時伏櫪奇抱多鬱賞音久稀終與世
違實由天定以公洞經綜史雕古潤今羅列宿於胸中
起五嶽於方寸何難俯合塵軌高掇巍科而乃十擲輒
鞭千管盡禿春明花月綠蠹空沾長安風雪黑貂已敝
六試南宮三薦不售已已禮闈大宗伯汪公守和以庶
子分校得公卷擊節歎賞遂列首薦一頭許放五色寧

迷重不凡之才有無雙之譽擬中復以額溢止揭曉後
宗伯諗公狷介有慕鴻儀爰命中車先造逆旅蓋前此
受薦諸公皆未嘗往謁也此其孤芳自賞清操特殊刺
任生毛心猶止水雖遇選多舛而寂寂無傷雖攀援有
由而飄飄轉遠求諸近世實所罕聞丁丑大挑不遇無
用世志樂在濠梁情寓園圃竹影成个石形似六置屋
一分種菊三徑比鄰無鵝鴨之惱留客有魚蝦之餐桐
帽蕉衫詩囊酒券雍雍如也所著愛餘閣詩專尙性靈
不事雕績自成馨逸無取辨華於道光丁未卒年六十
有九令嗣鑄范先生發納楹之書著誓墓之誥夙懷高
蹈恆誦清芬以余近接餘徽習知素行因出遺像徵及

鄙文嗚呼式穀似之縣延先人之澤維桑敬止流連通
德之門乃爲贊曰

春山之瑤韞石亦輝丹淵之珠沈泥亦奇珍非代有瑞
爲世希其見其潛豈人力爲懿歟伸舒胚胎靈淑擢秀
髻辨標異黨塾醞醞味深纏纏文速一瓜鎮心萬卷拄
腹名場騰蹕風雷疾驅橫埽虎僕周麾螯弧氣折羣彥
舌咋小儒尺五雲衢翹足以須焦原不驚強臺獨上旣
登秋賦復阻春榜玉泣荆巖珊漏鐵網榆鶯羣笑爨桐
孰賞眄彼京華冠蓋紛如花繡紫陌塵緇素裾公惡諠
囂鼓門瑟居名不署紙手惟檢書懇懇庶子翩然來下
亮節欽遲高文歎咤駿骨登臺牛心割炙一經品題十

倍聲價感士不遇賦歸去來臨流斫鱸和月鉏梅窻岫
闌幔簷花落杯息壤是盟終焉徘徊清德彌永先型罔
墜名傳家乘典符社祭馨烈風馳躩題潢治警欵如聞
敬哉後嗣

葉清甫補華精舍圖序

已酉之春余假榻洞庭綠階山館主人葉君扶九室有
載籍門無雜賓奇石瘦削側立於窻前異芩蔞藟平視
於檻畔硯池涸而巖氣潤書幔捲而峯鬢窺於焉嘯歌
殊愜情素君三子皆請業於余而清甫其季也靈質夙
稟慧心天悟每有詰難如響斯應頗樂親炙若影隨形
嘗與留盼庭柯怡情園木深紅淺白譜以有聲之詩細

蓄穠葩圖以沒骨之畫講學考藝斷斷如也秋間扶翁
歸道山生以哀毀輟業余亦謝去每念山中青松落陰
明月孤舉蕙帳空而鶴怨蘿窻掩而猿啼旣抱分襟之
感復背斗酒之誓象欹增歎愴然於懷澤鴻易磬淵鱗
不息行役良苦合并無期迺於落木之辰忽來疏麻之
寄以補華精舍圖乞弁其端余覽之益中若結韜紆回
而不能置焉夫絳趺朱萼孝子之守身啜菽飲水儒門
之養志人當婉變親側嬰媿膝前采陔南之蘭樹堂北
之草蔬圃霜脆味逾擊鮮菊泉井甘杯名益壽真樂在
於庭闈孺慕比之繯負依戀色笑願言終身今清甫雖
乾蔭已摧風木多恨而太宜人方年踰五袞齡延百祺

熙熙以含和。翬翬以禔福。棲峙之畜有賴。茅容之供觀
花之輿必待。潘岳之御鋤藥滿院。衰癯可扶。種堇一籬
滫髓無缺。則是圖也。非以寫其留連愛日之忱。報答春
暉之意乎。然書來謂將謁。選入都爲祿。養計豈以簪組
煥彩。萊服不華。鼎鐘列陳。藜糗失旨。歟。抑知捧毛義之
檄。不若扇黃香之枕也。遺考叔之羹。不若負仲由之米
也。人爵非貴。天倫最親。使必絕裾以就顯名。叱馭而升
峻阪。他日誦采杞之什。與藝黍之嗟。言念睽離。能無於
邑。若余者。棲畝本無餘糧。編茅僅存老屋。饑寒苦迫。晨
昏屢違。徒懷陟屺之思。時懸倚閭之望。倘得勞薪爨熄。
賣賦金多。饘粥能供。棗栗粗給。方將就清甫乞數椽之

庇爲連牆之居相與咒杏吟桃傳柑頌橘雜花俱放軒
窗其憑一櫺特甘盤餐互餉生旣洗腆以陳馨絜余亦
稱觴而祝眉梨兩老人顧之當必蹶然而笑矣丹青不
滅神魂與俱請藏此序執以爲券

葉漁莊太湖竹枝詞序

夫魚鳥之性恆習於寬閒山水之音必聆諸杳眇人有
解脫世網祓濯塵纓煙霞與之結鄰林泉若爲招隱游
跡所至摹笠屐以成圖賞音不孤引松石以爲侶當必
嘯傲自得謠詠相聞登陟之趣彌深放浪之吟斯作然
而穿穴溟滓徒損其靈明窮極幽遐無裨於心性則雖
奇境獨闢險語生新搜剔澗壑有類山經堆垛煙墨致

同繪匠流俗所許君子羞稱求其語有引徵辭尙諷諭
隸事悉原志乘選勝可爲導師於以紀民物之繁茂風
土之清淑者其惟漁莊司馬太湖竹枝詞乎司馬居傍
莫釐之峯門臨具區之水禽鳥聲聒屢其聽聞雲巒雜
沓堆於眉睫結想在塵壒之表游情於寥廓之天閒嘗
履巖巖凌滉瀆攬七二峯之深秀沿三萬頃之周遭見
其間室廬駢闐舟楫叢密桑竹花果之美菱蒲蒹芡之
饒兼以絳羽冗毛鮮鱗珍介貢奇於穹岫獻異於靈淵
皆可登諸風謠傳爲故實他若名區之窳奧古跡之流
傳軼事證以曩編遺聞訪諸野老聽輿人之誦託興莓
田尋廡子之謳流韻葭浦亦復兼綜並採援古据今義

有取於風人篇可陳於太史則是集也又豈僅頌美鄉
土留戀景物已哉僕嘗以傭書之役爲入山之客愛其
林壑幽邃原野衍沃耕者澤澤桑者閑閑若論風俗何
異武陵之源卽觀民情無殊葛天之代因欲撮其梗槩
寫以謳吟訂息壤之盟寄買鄰之願今讀此製先得我
心他日浮煙江釣篷製松陵漁具移家畫裏結廬水邊
開笱簷之窻著絞紵之服取君之所作次第而和之吾
知蘆之碕水之涘必有尋聲而至相視而笑者則以爲
皮陸復生也卽書此爲券可爾

候選州同知漁莊葉君誄

并序

維年月日候選州同知葉君漁莊卒於家明年某月某

日其孤鑄等奉君柩葬於某山之祖塋請誄於余余與
君交託撫塵愴聞輟瑟春江鯉訊芳緘尙存空山猿啼
蕙帷已冷失高惠夢中之路月落心驚憶喬公生前之
言車過腹痛以君精爽雖謝風微未淪似椒斯馨如石
之礪夷考實行無慚有道之碑導揚清芬可比仲宣之
誄泚淚命筆書之素旂其辭曰

吳越之間厥有具區川岫環抱煙雲與俱奇石韞玉澄
淵產珠靈淑所鍾降才亦殊懿君挺生石林名族粹美
含貞聰穎絕俗義爰夢吞禹書口讀汲古綆脩摛藻毫
速人爵匪貴天倫最親業因箕紹陔以蘭循興御潘岳
帽脫崔邠孝乎惟孝書言克遵恂恂鄉黨怡怡兄弟階

榮田荆室煖姜被伯也通方季兮達禮君敦友于無忝
前軌擗擋瑣屑惟內助賢閨門之內井然秩然防檢禮
法維後嗣嚴家庭之際肅焉穆焉游必有方百里而遠
滬瀆潮回吳淞水翦兩漿煙迷一篷雨卷拏舟往還興
復不淺詩社議約騷壇主盟敲銅限韻燒燭飛觥高蓋
團鶴畫簾語鶯與眾賓歡若爲平生尋山水緣耽煙霞
癖石磴搯筇雲巖著屐霜飄葉丹雨洗峯碧君於其間
獻歌自適二分之屋五畝之園引泉入檻疊石當軒種
樹有譜蓄鴨能言但得野趣不聞市喧有時評書有時
讀畫麋丸露研鴉叉壁挂顏柳辨體倪黃審派淘其金
沙別其糝牌樹護堂北戲綵花間春酒介壽聖藥駐顏

廁有婦滌飴共孫含慈烏夜樂孝筍冬甜志羨垂綸心
儀泊宅鷗閒同夢鴻冥比迹竹皮冠小楸頭船窄以遨
以嬉永朝永夕五湖之浹有室一廛顏曰漁莊於焉盤
旋菰米作飯蕩花成田煙水萬頃時聆扣舷憶余識君
已春之仲君喜余詩反覆哦誦茗熟斟甌醅香坼壻坐
我山牕笑語相共波萍易散風花黯驚君居山阿我客
海濱隴梅通使巖桂留人所思不見一水盈盈鴉軍亂
飛狼烽忽舉天塹竟渡金墉誰禦幕燕移巢屋烏擇處
方將就君謀我寧字芳鄰未接噩耗先來風中鶴唳月
下鷓哀吳岫雲斂虞淵日頽華年影逝石火光催嗚呼
哀哉包山嵯峨洞天第九石壇仙遺瓊笈神守邀我探

奇許我攜酒勞人草草此約終負蠡湖載泛鹿門乍歸
林掩昏靄峯含夕霏龍泉挂樹馬策撾扉山邱華屋屑
涕沾衣佳城旣營化臺早築丙舍神安庚泥堦卜虔殯
作歌楚些代哭悲纏旌松聲咽巖谷嗚呼哀哉

夢花亭駢體文集卷第四